

T CHL 2720.1132

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE


SEP 20 1988

72

宦官下

安傳

明史道真系列傳卷百七十九至百八十八



明史藁

列傳第一百七十九

光祿大夫

經筵講官明史總裁戶部尚書加七級臣王鴻緒奉

敕編撰

宦官下

哈佛大學
圖書館
珍藏印

張永

李芳

馮保

張鯨

陳增

陳奉

高淮

梁永

楊榮

陳矩

王安

魏忠賢

李永貞

劉若愚

涂文輔
崔文昇

王體乾

張彝憲

高起潛

王承恩

方正化

張永保定新城人武宗初總神機營與劉瑾爲黨居八虎之一既見瑾行事遂惡之爲人多智頗好附正人正德五年三月瑾言於帝將黜永居南京永覺之直趨帝前訴瑾陷已帝名瑾質之語相撓永拳毆瑾帝令谷大用等宣酒爲解由是與瑾不合安化王寘鐸反帝令永及右都御史楊一清往討臨發帝戎服幸東華門送永命兵部給金關防金瓜銅斧以行寵遇甚盛瑾益心忌而帝方嚮永無以間也及師出寘鐸已擒永遂率五百騎撫定餘黨還次靈州與一清言欲奏瑾不法事一清曰彼在帝左右公言能保必入乎不如以智圖之因爲畫誅瑾策語詳一清傳永大喜曰善及馳還遂奏誅瑾於是英國公張懋兵部尚書王敞等奏永輯寧中外兩建

奇勲宜錫封爵遂封永兄富爲泰安伯弟容爲安定伯天下皆頌永功涿州男子王豸涅刺龍形及人王宇於足永以爲妖禽之兵部尚書何鑑請加恩永帝下廷臣議永欲身自爲侯引劉馬兒鄭三保故事以風廷臣劉馬兒者劉永誠鄭三保者鄭和也閣臣辯二人非身受永意沮乃佯辭免恩澤吏部尚書楊一清因言宜聽永讓以成其賢會永同類方忌之事竟已久之庫官吳紀盜庫金七千爲御用監丘聚所發紀言受永指永坐閒住九年北寇大入塞命永督宣府大同延綏軍禦之寇退乃還寧王宸濠反都御史王守仁旣禽之矣帝聽張忠等言南征命永率邊兵二千人先行守仁檻車送宸濠永以帝意遮守仁欲縱宸濠歸鄱陽湖俟帝至與戰守

仁執不可至杭州詣永永拒不見守仁叱門者徑入大呼曰
我王守仁也來與公議國家事何拒我永見守仁忠憤慨
為氣懾守仁因極言江右荼毒已甚王師至亂將不測永大
悟乃曰永以羣小在側欲保護聖躬故來耳非欲攘功也雖
然公所檻與俱來者宜歸我守仁曰吾何用此卽以宸濠付
永而與永偕還江西時張忠等已從大江趨南昌辱知府伍
文定方窮治逆黨見永及守仁至大沮永留數旬促忠同歸
械宸濠獻於南京是時微永江西幾再亂忠等屢譖守仁賴
永營救始解武宗崩永提督九門防奸制變著輯寧勞世宗
立御史蕭淮等奏谷大用丘聚輩蠱惑先帝黨惡為奸并及
永永復囑任未幾淮復劾永前在江西擅權納賄故縱逆黨

輒以私忿械繫無辜今雖多辨釋而瘐死含冤者尚不可數
計宜宣法典以謝天下乃降永奉御司香孝陵嘉靖八年大
學士楊一清張璁等奏言永定宣鑄誅劉瑾扈武宗南征使
江彬不敢萌異志功大不可泯帝乃起永掌御用監提督團
營兼神機營操練未幾卒當世宗朝張佐鮑忠麥福黃錦皆
由興邸舊人入掌司禮或督東廠並歷二三十年無大過惡
故宦官之禍獨嘉靖一朝少殺云

李芳穆宗朝內官監太監也帝初立芳以能持正見信任初
世宗時匠役徐杲以營造蠧官工部尚書修盧溝橋所侵盜
萬計隆慶元年二月芳劾之時杲已劾官乃下獄遣戍杲屬
冒太僕少卿者一人苑馬卿二人布政司參議二人郎中一

人員外郎三人鴻臚丞光祿署正等銜以百數芳悉奏請裁汰冗冒爲清而是時司禮諸閹有滕祥孟冲陳洪者方有寵爭傾國帑飾奇技淫巧以悅帝意作鰲山燈導帝爲長夜飲數不視朝芳切諫帝不悅祥等復媒孽之帝遂怒落職閒住二年十一月復命杖芳八十下刑部獄監禁待決尚書毛愷等言芳罪狀未明臣等莫知所置詰非所以示天下公帝曰芳事朕無禮其錮之芳錮祥等益橫前司禮太監黃錦已革廢錦死祥奏用其姪浦襲原廢工部尚書雷禮世宗時以土木容悅至是知公論不予劾祥事事掣肘如傳造箱櫃採辦漆器修補增廟樂器祥輒自加徵糜費巨萬而工廠存留大木斬截任意用違其材臣禮力不能爭乞早賜罷帝不罪祥

而令禮致仕冲傳旨下海戶王印於鎮撫司論戍充軍法司不預聞肅懷王薨輔國將軍縉熿其季父也求襲冲納其厚賄爲之內主禮部引故事執不可給事中周詩御史劉良弼等皆爭之帝不聽竟封爲肅王洪尤貪肆竊柄內閣大臣亦有因之以進者三人所糜國帑無算帝享太廟皆冠進賢冠服祭服以從爵賞辭謝與六卿埒廷臣論劾者太常少卿周怡以外補去給事中石星李已陳吾德御史詹仰庇尚寶丞鄭履淳皆廷杖削籍三人各廢錦衣官至二十人而芳獨久繫獄四年四月刑科都給事中舒化等以熟審屆期請釋芳等部議芳等二十五人已瘦死其六存者並宜釋放詔釋芳充南京淨軍其他獲釋者九人

馮保深州人嘉靖中爲司禮秉筆太監隆慶元年提督東廠兼掌御馬監事時司禮掌印者缺保以次當得之適不悅於穆宗大學士高拱薦御用監陳洪代保由是疾拱及洪罷保愈欲得之而拱復薦用孟冲冲故掌尚膳監者例不當掌司禮保疾拱彌甚乃與張居正深相結謀去之會居正亦欲去拱專柄兩人交益固穆宗得疾保屬居正豫草遺詔草成遣使授保適爲拱所見面責居正曰我當國奈何獨與中人具遺詔居正面赤但曰公宥我容我改過拱亦益惡保思逐之穆宗甫崩保言於后妃斥孟冲而奪其位又矯遺詔令與閣臣同受顧命及帝登極保升立寶座旁不下舉朝大駭保旣掌司禮又督東廠兼總內外勢益張拱以主少國疑慮爲社

稷忠乃諷六科給事中程文等十三道御史劉良弼等交章歷數其奸而給事中雒遵陸樹德又特疏論列拱意疏下卽擬旨逐保保乃匿其疏而亟與居正定謀遂逐拱去初穆宗崩拱於閣中大慟曰十歲太子如何治天下保聞立遣其黨譖於后妃曰拱斥太子爲十歲孩子如何作人主后妃大驚太子聞之亦色變故保之讒言易入乃拱去而保之憾猶未釋萬曆元年正月有王大臣者僞爲內侍服入乾清宮被獲下東廠保欲緣此族拱與居正謀令家人辛儒飲食之納刃其袖中俾言拱怨望遣刺帝大臣許之踰日錦衣都督朱希孝等會鞫大臣疾呼曰許我富貴乃掠治我耶希孝懼不敢鞫而罷會廷臣楊博葛守禮等保持之居正亦迫衆議微諷

保保意稍解乃以生漆酒瘡大臣而移送法司坐斬拱獲免由是舉朝皆惡保而不肖者多因之以進慈聖太后遇帝嚴保倚太后勢數挾持帝帝甚畏之時與小內豎戲見保入輒正襟危坐曰大伴來矣所昵孫海客用爲乾清宮管事牌子屢誘帝夜游別宮小衣窄袖走馬持刀又數進奇巧之物帝深寵幸保皆言於太后后召帝切責帝長跪受教惶懼甚保屬居正草帝罪已手詔令頒示閣臣詞過搥損帝年已十八覽之內慚然迫於太后不得不下居正乃上疏切諫又緣保意劾去司禮秉筆孫德秀溫太及掌兵仗局周海而令諸內侍俱自陳由是保所不悅者斥退殆盡時八年十一月也保善琴能書帝初甚重之屢賜牙章曰光明正大曰爾惟鹽梅

曰風雲

以待之甚隆後保

益橫肆卽帝有所賞罰非出保口無敢行者帝積不能堪而保內倚太后外倚居正帝不能去也然保亦時引大體內閣產白蓮翰林院有雙白燕居正以進保使使謂居正曰主上冲年不可以異物啟其玩好又能約束其子弟不敢肆惡都人亦以是稱之居正固有才其所以得委任專國柄者由保爲之左右也然保性貪其私人錦衣指揮徐爵內宮張大受恃勢招權利罔厭大臣亦多與通保居正內外相隔爵爲交關語言且數用計使兩人相疑旋復相好兩人皆在爵術中事與籌畫爵夜至禁門守衛者不敢詰其橫如此居正之奪情及杖吳中行等保有力焉及居正死其黨慮有更張咸結

保自固居正以遺疏薦其座主潘晟入閣保卽遣官召之御史雷士楨王國給事中王繼光相繼言其不可用晟中途疏辭內閣張四維度申時行不肯爲晟下擬旨允之帝卽報可保時病起詎曰我小恙遽無我耶皇長子生保欲封伯爵四維以無故事難之擬廢弟姪一人都督僉事保怒曰爾山誰得今日而負我御史郭惟賢請召用吳中行等保責其黨救謫之吏部尚書王國光罷保輒用其鄉人梁夢龍代爵大受等猶竊權如故然是時太后久歸政保失所倚而帝又積怒保東宮舊閣張鯨張誠乘間陳其過惡請令閒住帝猶畏保曰若大伴上殿來我如何處置鯨曰既有旨保安敢復入帝悟乃從之會御史李權江東之彈章入遂謫保奉御南京安

置其弟佑從子邦寧並官都督亦削職大受及其黨周海何忠等八人悉貶小火者司香孝陵已而盡籍其家保金銀百餘萬珠寶瑰異稱是莊田宅舍亦皆沒入復逮佑邦寧下獄悉瘐死大受等所籍亦不貲內庫爲之充物爵下詔獄與大受子皆烟瘴永戍保之發南京也太后問故帝曰老奴爲張居正所惑無他過行且召還時潞王將婚所需珠寶未備太后問以爲言帝曰年來無恥臣僚盡貨以獻張馮二家其價驟貴雖僅一二費貲數萬太后曰已籍矣必可得帝曰奴黠猾先竊而逃未能盡得也其時御史毛在劾錦衣都督劉守有奉命籍罪人家與其僚屬張昭龐清馮斯等多所隱沒昭等亦下詔獄保竟卒於南京說者謂帝之好貨由張馮二家

所籍多故後多行籍沒之法云

張鯨新城人太監張宏名下也內豎初入宮必投一大璫爲至謂之名下云馮保用事鯨害其寵爲帝畫策害保宏偵知之謂鯨曰馮公前輩且有骨力不宜去之鯨不聽既譖逐保宏遂代保掌司禮監而鯨掌東廠宏無過惡頗著賢聲萬曆十二年卒張誠代掌司禮監十八年鯨罷東廠誠兼掌之二十四年春以誠聯姻武清侯擅作威福降奉御司香孝陵籍其家弟姪張勳等皆削職治罪鯨性剛果帝倚任之其在東廠兼掌內府供用庫印頗爲時相所憚而其用事司房刑尚智招權受賂萬曆十六年冬御史何出光劾鯨及其黨瀉臚序班尚智與錦衣都督劉守有相倚爲奸專擅成福罪當死

者八賊私未易縷指帝命鯨策勵供事而削尚智守有職餘黨法司提問給事中陳尚象吳文梓楊文煥御史方萬策崔景榮復相繼論列報聞法司奏鯨等賊罪尚智論死鯨被切責不罪給事中張應登再疏論之不聽御史馬象乾疏爭并劾內閣阿縱大學士申時行等自請賜罷吏部尚書楊巍等乞將鯨正法以洩衆忿帝不聽時行等辭而命下象乾詔獄時行及同官許國王錫爵皆上疏申救帝乃留象乾疏於中給事中李沂復抗疏攻鯨且謂帝納鯨金寶故寬鯨罪帝大怒言沂等爲張居正馮保報復下沂詔獄獄上命杖六十削其官時行等力救不聽鯨迫衆論乞罷乃命私家閒住時論頗謂張誠與鯨交惡朝臣有所恃以故力攻之已而南京御

史俞咨禹請正鯨罪帝報已有旨南京兵部尚書吳文華率南九卿請罪鯨而宥言者不聽文華遂乞休去未幾帝復召鯨入給事中陳與郊御史賈希夷南京吏部尚書陸光祖給事中徐常吉御史王以通等皆言鯨隨進隨退爲國家大憂俱不報最後大理評事雒于仁上酒色財氣四箴指鯨以賄復進帝怒甚召申時行等入毓德宮命治于仁而召鯨至今時行等傳諭責訓之鯨寵由是漸衰尚智後減死充軍陳增神宗朝礦稅太監也帝心頗好利左右數以利嘗之萬曆十二年房山縣民史錦奏請開礦通政司倪光薦爲上之帝下撫按查勘不果行十六年中使祠五臺山還言紫荊關外廣昌靈丘有礦砂可作銀冶帝聞之心喜以大學士申時

行等言不得已命塞礦洞十八年易州民周言張世才復言阜平房山各產礦砂請遣官開礦時行等仍執不可至二十一年寧夏用兵費帑金二百餘萬其冬朝鮮用兵首尾八年費帑金七百餘萬二十七年播州用兵又費帑金二三百萬三大征踵接國用大匱而二十四年乾清坤寧兩宮災二十五

年皇極中極建極二殿災營建之資計臣蒿目礦稅由此大興其遣官自二十四年始是時千戶仲春復請開礦廷臣皆言非便帝決意行之閣臣趙志臯張位陳于陞沈一貫不能沮或曰位益默贊其事云其後言礦者爭走闕下中使四出真保薊永則王亮昌黎遷安則田進昌平橫嶺涑水珠寶窩山則王忠肅定復益以王虎并採山西平定穆山浙江則曹

金後代以劉忠陝西則趙欽山西則張忠河南則魯坤廣東則李鳳李敬雲南則楊榮遼東則高淮江西則潘相福建則高宗湖廣則陳奉而增奉勅開採山東他若通灣天津臨清湖口儀直蘇杭皆有稅監兩淮則有鹽監廣東則有珠監或專遣或兼攝大璫小監縱橫繹騷吸髓飲血以供進奉大率入公帑者不及什一而天下蕭然生靈塗炭矣二十四年增始至山東卽劾福山知縣韋國賢帝爲逮問削職益都知縣吳宗堯抗增被陷幾死詔獄巡撫尹應元奏增二十大罪亦罰俸已復命增兼徵山東店稅與臨清稅監馬堂相爭帝爲和解使堂稅臨清增稅東昌增勢益橫其黨內閣中書程守訓中軍官仝治等自江南北至浙江大作奸弊稱奉密旨撻

金寶募人告密誣大商巨室藏違禁物所破滅什伯家殺人莫敢問御史劉日梧具以狀聞鹽務少監魯保亦奏守訓等阻塞鹽課帝俱弗省久之鳳陽巡撫李三才劾守訓奸賊增懼因搜得守訓違禁珍寶及昧銀四十餘萬聞於朝命械入京鞫治乃論死增肆惡山東十年至三十三年始死

陳奉御馬監奉御也萬曆二十七年二月命徵荊州店稅兼採興國州礦洞丹砂及錢厰鼓鑄事奉兼領數使恣行威虐每託巡歷鞭笞官吏剽劫行旅商民恨次骨乃伺奉自武昌抵荊州時聚數千人譟於塗競擲瓦石奉走免遂誣襄陽知府李商耕黃州知府趙文煒荊州推官華珏荆門知州高則翼黃州經歷車任重等煽亂帝爲逮珏任重而謫商耕等官

興國州奸人漆有光許居民徐鼎等掘唐相李林甫妻楊氏墓得黃金巨萬騰驤衛百戶仇世亨奏之帝命奉括進內庫奉因毒拷責償且悉發境內諸墓巡按御史王立賢言所掘墓乃元呂文德妻非林甫妻奸人許奏語多不讐請罷不治而停他處開掘不報二十八年正月奉奏武昌民千餘於去年臘月蜂涌臣署拋磚擊臣僅以身免二月南京吏部主事吳中明奏湖廣激變情形言奉嚇詐官民僭稱千歲其黨至直入民家臥房奸淫婦女或掠入稅監府內王生員之女沈生員之妻皆被逼辱以致士民公憤湧至萬餘甘與奉同死撫按三司護之數日僅得全而巡撫支可大曲爲蒙蔽天下禍亂將何所底大學士沈一貫亦言陳奉入楚始而武昌

一變繼之漢口黃州襄陽武昌寶慶德安湘潭等處變經十起幾成大亂乞大沛弘仁以收楚民之心帝皆置不問奉復使人開穀城礦不獲脅其庫金爲縣民所逐武昌兵備僉事馮應京劾奉十大罪奉隨奏疏誣之卽降應京雜職奉又開棗陽礦知縣王之翰以顯陵近執不可奉劾之翰并及襄陽通判邸宅推官何棟如給事中田大益御史李以唐等合疏爲之翰等言帝不聽緹騎逮訊并追逮應京應京素有惠政民號哭往送切齒恨奉奉又榜列應京罪狀於衢衆復相聚萬餘圍奉公署誓必殺奉奉逃匿楚王府衆乃投奉黨耿文登等十六人於江以巡撫可大護奉燔其轅門事聞一貫及給事中姚文蔚等請撤奉不報而御馬監監丞李道方督理

湖口船稅亦奏奉水沮商舟陸截販賈徵三解一病國剝民
帝始從道言召奉歸而用一貫請革可大職以工部侍郎趙
可懷代奉在湖廣二年慘毒備至及去金寶財物鉅萬計可
大懼爲民所掠多與徒衛巡按立賢議留奉行囊簡其數上
聞監司力沮之乃已可懷已入境亦使人導之出疆楚民無
不恨可大可懷者奉至京師給事中陳維春郭如星復極言
其罪帝不懌降二人雜職三十二年始釋應京歸之翰卒痲
死當奉劾商耕等時臨清民亦譟而逐馬堂馬堂者天津稅
監也兼轄臨清始至諸亾命從者數百人白晝手銀鎊奪人
產抗者輒以違禁罪之僮告王者昇以十之三中人家破
者大半遠近爲罷市州民萬餘縱火焚堂署斃其黨三十七

人皆黥臂諸偷也事聞詔捕首惡株連甚衆有王朝佐者素
仗義慨然出曰首難者我也勿累無辜臨刑神色不變知府
李士登恤其母妻臨清民立祠以祀後十餘年堂擅往揚州
巡鹽御史徐縉芳劾其九罪不問

高淮尚膳監監丞也神宗寵愛諸稅監自大學士趙志臯沈
一貫尚書李戴趙世卿楊俊民都御史溫純巡撫魏允貞李
三才給事中包見捷御史王業弘等先後諫不下百餘疏悉
寢不報而諸稅監有所糾劾朝上夕下輒加重譴以故諸稅
監益驕而淮及梁永尤甚淮自萬曆二十七年春承命採礦
徵稅於遼東委官廖國泰嘗虐民激變淮誣繫諸生數十人
巡按楊宏科救之不報參隨楊承恩婪賄事發奉旨會勘卒

不問淮遼東總兵馬林不爲淮下淮劾其抗法帝爲削林職給事中侯先春救之遂戍林而謫先春雜職巡按何爾健與淮互訐奏淮遣人邀截於路責其役而錮之獄匿疏不以聞給事中孫善繼劾之不報淮請復遼東馬市巡撫趙楫力爭始得寢三十一年夏淮率家丁三百餘張飛虎幟金鼓震天聲言欲入大內謁帝遂潛住廣渠門外給事中田大益孫善繼姚文蔚等言淮於春寒雪擁時統家丁數百沿邊搜括士民取金至數十萬今又聲言入京卽求鎮守陽駭軍民之耳目陰奪將吏之兵權招納諸叀命降人動搖山嶽意欲何爲吏部尚書李戴刑部尚書蕭大亨皆劾淮擅離信地挾兵潛任京師乃數百年未有之事御史袁九臯劉四科孔貞一給

事中梁有年等各疏劾淮不報巡撫楫劾淮罪惡萬端且無故打死指揮張汝立亦不報淮因上疏自稱鎮守協同關務尚書大亨遷兵部爭曰鎮以保巖疆關以訐奸宄淮職止稅監不應妄干帝心護淮謬曰朕固命之矣淮自是益募死士時時出塞射獵發黃票龍旂走朝鮮索冠珠貂馬數與邊將爭功山海關內外咸被其毒又扣除軍士月糧三十六年四月前屯衛軍盡甲而譟誓食淮肉六月錦州松山軍復變淮所遣承舍吳守政自剄淮懼內奔大學士朱賡言未踰月而遼境四亂皆淮所致饑軍合叛衆臣不知遼事之終矣淮旣逃死遂卸罪於同知王邦才參將李孟陽言二人逐殺欽使劫奪御用錢糧二人皆逮問邊民益譁薊遼總督蹇達再疏

暴淮罪乃召歸而以通灣稅監張晷兼領其事孟陽竟死獄中邦才至四十一年乃釋

梁永御馬監監丞也萬曆二十七年二月命往陝西徵收名馬貨物稅監故不典兵永獨畜馬五百匹招致凶命用桀黠千戶樂綱出入邊塞富平知縣王正志發其奸并劾礦監趙欽帝庇永欽逮正志瘐死詔獄中渭南知縣徐斗牛廉吏也永遣役責賂坐渭南聽事詎斗牛箠斃縣吏卒斗牛憤恨自縊死巡撫賈待問奏之帝顧使永會勘永反劾西安同知宋賢使諸生許顯忠等倡亂并劾待問有私請皆勘帝從之惟宥待問永又請兼鎮守職銜又請率兵巡花馬池慶陽諸鹽池徵其課督撫交章沮之皆不報永緣是帥諸凶命具旌蓋

鼓吹巡行陝地盡發歷代陵寢搜摸金玉旁行劫掠擅鑄兵器私匿軍士千餘戰馬五百所至邑令皆逃杖死縣丞鄭思顏指揮劉應聘諸生李洪遠等縱樂綱等宣淫占掠私宮良家子數十人稅額之外增耗數倍藍田等七關歲得十萬七歲所入以七十萬計復用奸人胡奉言索咸陽冰片五十斤羊毛一萬斤麝香二十斤知縣宋時際怒勿予咸寧人道行遇盜跡之稅使役也知縣滿朝薦捕得方鞫訊永反誣時際朝薦劫稅銀繫其役三十四年二月帝命逮時際而以朝薦到官未久鐫秩一級陝西巡撫顧其志盡發其奸且言永聞有詔撤稅使不勝怏怏遣爪牙四出囂張致萬眾驚異共圖殺永大學士沈鯉朱賡奏曰秦民疾永甚矣乞械永歸以安

衆心帝悉置不報而釋時際勿逮復朝薦官會御史余懋衡
方按陝西永懼使綱醜懋衡幾死訟於朝言官攻永者數十
疏御史王基洪言永必反帝皆不問而永部下諸亾命乃稍
稍散其渠魁王九功石君章等齎重寶輜輶盈路詐爲上供
物持劍戟弓弩結陣以行而永所遣人解馬匹者已乘郵傳
先發九功等急馳欲追及與同出關時朝薦懲前盜選民兵
偵邏見郵傳去久而九功等後至無驗遂與格鬪追至渭南
殪數人盡奪其裝御史懋衡以捕盜設傷聞永大窘聽樂綱
謀使人繫疏髮中馳奏言九功等各貢名馬橐金珠寶石睛
綠鐸針諸物而咸寧知縣朝薦承余御史指伏兵渭南遮劫
之懋君章等誣以盜帝見永奏怒曰御史醜無恙而朝薦代

爲報復且劫貢物救逮朝薦而令撫按護永等還京

楊榮尚膳監監官也萬曆二十七年春命採礦雲南并使監
稅旣至妄奏阿瓦猛密諸番願內屬其地有寶井多睛綠珍
瑰之屬可歲益數十萬願賜專勅領其事帝許之旣而榮所
進不得什一乃誣知府熊鐸侵匿下法司又請詔麗江土知
府木增獻地聽開採巡按御史宋興祖言太祖令木氏世守
茲土限石門以絕西域守鐵橋以斷吐蕃奈何自撤藩蔽生
遠人心不報榮由是愈怙寵誣劾尋甸知府蔡如川趙州知
州甘學書皆下詔獄已又誣劾雲南知府周鐸下法司提問
百姓恨榮入骨相率燔稅廠殺委官張安民榮猶弗悛恣行
威虐杖斃數千人三十四年正月怒操捕指揮使樊高明後

期榜掠絕觔枷以示衆又以求馬不獲繫指揮使賀瑞鳳且言將盡捕六衛官於是指揮賀世勛韓光大等率冤民萬人焚榮第殺之投火中并殺其黨二百餘人事聞帝爲不食者數日欲逮問守土官大學士沈鯉揭爭且密屬太監陳矩剖示帝乃止誅首兇世勛等而用巡撫陳用賓議令四川稅使丘乘雲兼攝雲南事是時帝所遣中官無不播虐逞兇者湖口稅監李道劾降九江府經歷樊圃充又劾逮南康知府吳寶秀星子知縣吳一元降臨江知府顧起淹山西稅監孫朝劾降夏縣知縣韓薰給事中程紹救之鑄紹一秩給事中李應策等復救之遂削紹薰職朝尋許巡撫魏允貞阻撓指爲梟獍允貞竟罷去廣東稅監李鳳劾逮鄉官通判吳應鴻等

鳳與珠池監李敬相仇巡按李時華特敬援抗疏劾鳳給事中宋一韓言鳳乾沒五千餘萬他珍寶稱是吏部尚書李戴等言鳳釀禍致潮陽鼓譟粵中人爭欲殺之帝不問而敬惡亦不減於鳳採珠七八年歲得珠近萬兩其後珠池盜起而所採珠僅二百餘兩敬乃疏請罷採詔令封池山西礦監張忠劾降夏縣知縣袁應春又劾逮西城兵馬戴文龍江西礦監潘相激浮梁景德鎮民變燒焚廠房饒州通判陳奇可諭散之相反劾逮奇可相檄上饒縣勘礦洞知縣李鴻昧爽飽食與相偕往而戒邑人敢以食物市者死相竟日饑渴憊而歸乃罄鴻罷其官橫嶺礦監王虎以廣昌民變燒毀生祠并及銀礦劾降易州知州孫大祚蘇杭織造太監兼管稅務孫

隆激民變遍焚諸札委稅官家隆急走杭州以免有司捕亂者民葛成獨承論死久之遇赦得生福建稅監高家薦布政使陳性學立擢巡撫居閩十餘年廣肆毒害四十二年四月萬眾洶洶欲殺家家率甲士二百餘人入巡撫袁一驥署露刃劫之令諭眾退復挾副使李思誠僉事呂純如等至私署要盟始釋一驥復拘同知陳豸於署者久之事聞帝召家還命出豸而一驥由此罷他若山東張昱河南魯坤四川丘乘雲輩皆為民害迨帝崩始下遺詔罷礦稅撤諸中使還京陳矩安肅人萬曆中為司禮秉筆太監二十六年提督東廠為人平恕識大體嘗奉詔收書籍中有侍郎呂坤所著圍範圖說帝以賜鄭貴妃妃自為序鈔諸本時國本未定或作圍

範圖說跋名曰憂危竑議大指言鄭妃欲奪儲位坤陰助之并及張養蒙魏允貞等九人語極妄誕踰三年皇太子立及三十一年十一月甲子昧爽自朝房至勳戚大臣門各有匿名書一帙名曰續憂危竑議言鄭妃與大學士朱賡戎政尚書王世揚三邊總督李汶保定巡撫孫瑋少卿張養志錦衣都督王之楨千戶王名世王承恩等相結謀易太子其言益妄誕不經矩獲之以聞大學士賡奏亦入帝大怒敕矩及錦衣衛大索必得造妖書者時大獄猝發緝校交錯所株連甚眾醫沈令譽百戶劉栢僧達觀等俱逮繫之楨欲陷錦衣指揮周嘉慶首輔沈一貫欲陷次輔沈鯉侍郎郭正域俱使人屬矩矩正色拒之已而百戶蔣臣捕皦生光至生光者京師

人素無行嘗偽作富商包繼志詩有鄭王乘黃屋之句以脅國泰及繼志金及是被訊備楚毒妻妾子弟皆掠治無完膚生光惟言前罪當死後罪寔冤矩心念生光卽冤然獄無主名上必怒甚恐輾轉攀累無已時禮部侍郎李廷機復以生光前詩與妖書詞合遂定獄具爰書上生光坐凌遲死鯉正域嘉慶及株連者皆賴矩得全時論稱之三十二年掌司禮監督廠如故帝欲杖建言參政姜士昌賴矩諫止雲南民殺稅監楊榮帝欲盡捕亂者亦以矩言獲免明年奉詔慮囚平反多又明年卒賜祠額曰清忠自馮保張誠張鯉相繼獲罪其黨有所懲不敢大肆帝亦惡其黨盛有犯不貸有缺多不補迨晚年用事者寥寥東廠獄中至生青草帝常膳舊以司

禮輪供後司禮無人乾清宮管事牌子常雲獨辦以故偵卒稀簡中外相安惟四方採權者帝實縱之故致漁利於下云王安雄縣人爲內侍出馬保名下萬曆二十二年陳矩薦於帝命爲皇長子伴讀時鄭貴妃謀易樹子數使人撫皇長子過安善調護貴妃無所得比太子立久而東宮有挺擊事貴妃心懼安屬草勸太子下令旨釋羣臣疑以安貴妃帝乃悅光宗卽位擢司禮秉筆太監遇之甚厚安信用其客中書汪文言文言使安言於帝行諸善政發帑金濟邊起用直臣鄒元標王德完等中外翕然稱賢大學士劉一燝給事中楊漣御史左光斗等皆重之初西宮李選侍怙寵凌熹宗生母王才人安內忿不平及光宗崩選侍與心腹閹李進忠等謀挾

皇長子自重安發其謀於漣漣卽偕一燦等入臨安給選侍抱皇長子出擇吉卽位選侍無所挾不得已移別宮宮幃大定熹宗心德之言無不納安爲人剛直而踈又善病不能數見帝魏忠賢始進自結於安名下魏朝朝日夕譽忠賢安信之及安怒朝與忠賢爭客氏也勒朝退安勢遂孤忠賢客氏日得志心忌安天啟元年五月帝命安掌司禮監安辭客氏勸帝從其請與忠賢謀殺之忠賢猶豫未忍客氏曰爾我孰若西李而欲遺患耶忠賢意乃決嗾給事中霍維華論安降充南海子淨軍而以劉朝爲南海子提督使殺安劉朝者李選侍私闖故以移宮盜庫下獄宥出者旣至絕安食安竊取籬落中蘆葍嚼之三日猶不死乃撲殺之安死三年忠賢遂

誣東林諸人與安結黨興大獄清流之禍烈矣莊烈帝立賜祠額曰昭忠

魏忠賢者肅寧人也少無賴善馬射尤好博嘗與悍少年博不勝爲所苦恚而自宮變姓名曰李進忠其後乃復姓賜名忠賢云忠賢自萬曆中選入宮隸太監孫暹與其儕徐應元等博益甚數負暹大窘走四川丐於稅監丘乘雲乘雲聞其無行也怒幽之旣而釋歸寅緣入甲字庫漸饒給乃求爲皇長孫母王才人典膳因魏朝朝故隸王安數爲安稱忠賢安亦善遇之長孫乳媪曰客氏素私侍朝所謂對食者也及忠賢入又通焉客氏遂薄朝而愛忠賢忠賢益市珍膳玩好因以獻長孫導之遊戲得長孫歡光宗崩長孫嗣立是爲熹宗

忠賢客氏並有寵未踰月封客氏奉聖夫人廢其子侯國興弟客光先及忠賢兄釗俱錦衣千戶忠賢等自惜薪司遷司禮秉筆太監兼提督寶和三店忠賢不識字例不當入司禮以黃緣得之天啟元年詔賜客氏香火田叙忠賢入皇祖陵功御史王心一諫不聽及帝大婚御史畢佐周劉蘭請遣客氏出外大學士劉一燝亦言之帝戀戀不忍舍曰皇后幼賴媪保護俟皇祖大葬議之忠賢欲顯客氏妒魏朝逐之又忌王安持正與客氏謀殺諸南海子盡斥安名下諸人客氏淫而很忠賢不知書頗強記猜忍陰毒好諛帝深信任此兩人兩人愈相結用司禮監王體乾及李永貞石元雅涂文輔等爲羽翼宮中人莫敢忤旣而客氏出復召入御史周宗建侍

郎陳邦瞻御史馬鳴起給事中侯震暘先後力爭俱被詰責給事中倪思輝朱欽相王心一復言之並謫外尚未指及忠賢也忠賢乃始勸帝選武閣練火器建立內操密遣掌班劉榮結大學士沈灌爲援又日引帝爲倡優聲伎狗馬射獵使耽於淫樂不恤國政刑部主事劉宗周直劾忠賢帝大怒賴大學士葉向高救僅得免於是徐大化霍維華孫杰首附忠賢孫杰遂劾去劉一燝及尚書周嘉謨以立效忠賢始樹黨外廷矣然是時葉向高韓爌方輔政鄒元標趙南星王紀高攀龍等皆居大僚左光斗魏大中黃尊素等在言路皆力持清議忠賢未克逞二年叙慶陵功廢忠賢弟姪錦衣衛指揮僉事給事中惠世揚尚書王紀論沈灌交通客魏俱被譴去

會初夏雨雹周宗建言雹不以時忠賢讒慝所致修撰文震孟太僕少卿滿朝薦相繼言之亦俱黜三年春引其私人魏廣微爲大學士令御史郭鞏許宗建一燦元標及楊漣周朝瑞等保舉熊廷弼黨邪誤國宗建駁鞏受忠賢指揮御史方大任助宗建攻鞏忠賢皆不勝其秋詔忠賢及客氏子國興所廢錦衣官並世襲兵部尚書董漢儒給事中程註御史汪泗論交諫勿從忠賢由是益無忌增置內操萬人出入皆衷甲慮妃嬪白其罪復與客氏謀矯詔賜光宗選侍趙氏死裕妃張氏有娠令客氏譖於帝餓死復道中又革成妃李氏封皇后張氏娠會有疾客氏使宮婢以計墮其胎帝由此乏嗣他所害宮嬪馮貴人等太監王國臣劉克敬馬鑑等甚衆禁

掖事祕莫詳也是冬兼掌東廠事四年給事中傅櫬結忠賢甥傅應星爲兄弟誣奏中書汪文言並及左光斗魏大中下文言鎮撫獄將大行羅織掌鎮撫劉僑受葉向高教止坐文言無株及者忠賢大怒削僑籍而以許顯純代是時御史李應昇以內操諫給事中霍守典以忠賢乞祠額諫御史劉廷佐以忠賢濫廢諫給事中沈惟炳以立枷諫忠賢皆矯旨詰責於是副都御史楊漣憤甚劾忠賢二十四大罪疏上忠賢懼求解於韓爌爌不應遂趨帝前泣訴且辭東廠而客氏從旁爲剖析體乾等爭翼之帝懵然不辨也遂溫諭留忠賢而於次日下漣疏嚴旨切責漣旣絀魏大中及給事中陳良訓許譽卿等御史劉璞楊玉珂帥衆等太常卿胡世賞祭酒蔡

毅中等撫寧侯朱國弼南京兵部尚書陳道亨侍郎岳元聲等七十餘人交章論忠賢不法向高及禮部尚書翁正春請遣忠賢歸私第以塞謗帝不許當是時忠賢憤甚欲盡殺異已者顧秉謙因陰籍所忌者姓名授忠賢使以漸斥逐王體乾復昌言用廷杖威脅廷臣未幾工部郎中萬燦上疏刺忠賢忠賢使羣閹粹至闕下立杖死御史林汝翥誤答一火者懼而亾忠賢疑汝翥匿向高所使羣閹謀而索之向高遂致仕去汝翥尋得又予杖廷臣俱大驚也忠賢黨御史陳九疇因會推山西巡撫劾吏部員外郎夏嘉遇給事中魏大中黨太常卿謝應祥獲推皆黜去忠賢又罷吏部尚書趙南星左都御史高攀龍而令別推可吏部都察院者既推上又矯旨

責吏部侍郎陳于廷及楊漣左光斗黨比削籍又謫御史袁化中房可壯文選郎中張光前已又謫給事中許譽卿陶崇道陳良訓逐韓爌及兵部侍郎李邦華一時正人去國紛紛若振槁乃矯中旨召用例轉科道以朱童蒙郭允厚爲太僕少卿呂鵬雲孫杰爲大理丞復霍維華郭興治爲給事中徐景濂賈繼春楊維垣爲御史而起徐兆魁王紹徽喬應甲徐紹吉阮大鍼陳爾翌張養素李應薦李嵩楊春懋等爲之爪牙未幾復用擬戍崔呈秀爲御史呈秀乃造天鑒同志諸錄王紹徽亦造點將錄皆以鄒元標顧憲成葉向高劉一燝等爲魁盡羅入不附忠賢者統號曰東林黨人獻於忠賢忠賢喜於是羣小益求婚忠賢攘臂攻東林矣御史張訥以其兄

樸求巡撫不得也怨趙南星追劾之并及史記事丁元薦等二十餘人皆獲譴朱童蒙先為巡撫周起元所劾給事中李魯生右童蒙劾起元削其籍御史梁夢環知忠賢恨未已再劾汪文言五年春喬應甲十疏訐東林李三才及張問達趙南星曹于汴段然諸人顧秉謙等擿湖廣江西山東福建鄉試錄中語謫主考顧錫疇丁乾學等八人徐大化訐漣光斗等黨同伐異工部主事曹欽程誣劾東林黨周宗建等四人並緣飾忠賢意醜正惡直無所不至忠賢寔駭無他長既得志特恨東林諸人數論其罪耳於辛亥癸亥京察熊廷弼封疆挺擊紅丸移宮三案無預也其黨欲藉忠賢力翻局傾諸正人遂相率稱義兒且云東林將害翁以故忠賢甘心東林

而劉廷元馮三元范濟世岳駿聲李魯生李恒茂張文熙劉徽等競搏擊善類為報復汪文言逮至下鎮撫司拷死許顯純具爰書詞連趙南星楊漣等二十餘人忠賢令顧秉謙票旨削籍遣戍有差而逮漣左光斗魏大中周朝瑞袁化中顧大章等六人至牽入熊廷弼案中顯純掠治備楚毒皆死於獄又殺廷弼而緩棄廣寧者王化貞死御史倪文煥先忤忠賢懼請攻東林以自贖遂訐吏部郎周順昌等又訐御史夏之令等之令亦冤死既而御史陳睿謨徐揚先石三畏盧承欽王珙陳以瑞劉弘光給事中趙興邦蘇紹先尚寶卿吳殿邦等復先後攻尚書李宗延侍郎公鼐等削逐至四十餘人又以中旨削尚書張問達等十餘人以熊廷弼故杖其姻御

史吳裕中至死朝署一空而特召元詩教劉述祖等爲御史私人悉不次超擢於是忠賢之黨徧要津矣當是時東廠番役橫行所緝訪無論虛實輒糜爛戚臣李承恩者寧安大長公主子也家藏公主賜器忠賢誣以盜乘輿服御物論死中書吳懷賢讀楊漣疏擊節稱歎奴告之斃懷賢籍其家武弁蔣應陽爲廷弼訟冤立誅死民間偶語或觸忠賢輒被禽僇甚至剝皮割舌所殺不可勝數道路以目其年敘門功加恩三等廕都督同知又廕其族叔魏志德都督僉事擢傅應星爲左都督且旌其母而以魏良卿僉書錦衣衛掌南鎮撫司事六年春忠賢復從霍維華楊所修言修三朝要典以顧秉謙黃立極馮銓爲總裁施鳳來楊景辰孟紹虞曾楚卿副之

率極意詆媢暴揚黨人罪惡二月鹵簿大駕成廕都督僉事浙江太監李實送空印疏至忠賢使李永貞僞爲實奏誣劾前應天巡撫周起元及江浙里居諸臣高攀龍周宗建繆昌期周順昌黃尊素李應昇等并逮治攀龍赴水死順昌等六人至顯純鞫治如楊漣等皆死蘇州民見順昌逮不平毆殺二校尉巡撫毛一鷺爲捕顏佩韋等五人悉誅死刑部尚書徐兆魁治獄視忠賢所怒卽坐大辟當給事惠世揚斬御史方震孺絞東廠緝戶部主事李柱明盜官穀亦坐斬又戍斥黃龍光熊明遇毛士龍等數十人御史徐復陽請毀講學書院以絕黨根御史盧承欽請立東林黨碑海內皆屏息喪氣霍維華遂教忠賢冒邊功矣遼陽男子武長春遊妓家有妾

言東廠禽之許顯純掠治故張其辭云長春敵間不獲且為
亂賴廠臣忠智立奇勲詔封忠賢姪良卿為肅寧伯賜宅第
莊田頒鐵券吏部尚書王紹徽言忠賢勲績下逮其姪宜上
崇其先詔贈忠賢四代如本爵忠賢又矯詔遣其黨太監劉
應坤陶文紀用鎮山海關收攬兵柄再敘功廕都督同知世
襲錦衣衛指揮使各一人浙江巡撫潘汝楨奏請為忠賢建
祠倉場總督薛貞言草場火以忠賢救得無害於是頌功德
者相繼諸祠皆自此始矣編修吳孔嘉與宗人吳養春有讐
誘養春僕告其主隱占黃山養春父子歿死忠賢遣主事呂
下問評事許志吉先後往徽州籍其家株蔓殘酷知府石萬
程不忍削髮去徽州幾亂揚州知府劉鐸詒遊僧扇中有陰

霾國是非句實歐陽暉書也東廠獲僧并逮鐸事白矣其黨
都督張體乾復誣鐸代李承恩謀釋獄結道士方景陽誣忠
賢鐸竟斬西市又以睚眦怨誣新城侯子錦衣王國典論斬
并黜主事徐石麒誣秦寧侯陳良弼恭順侯吳汝胤受京營
將士賄追入官御史門克新誣吳人顧同寅孫文豸誣熊廷
弼坐妖言律斬又逮侍郎王之寀斃於獄凡忠賢所宿恨若
韓爌張問達何士晉程註等雖已去必削籍重或充軍死必
追贓破其家或忠賢偶忘之其黨必追論前事激忠賢怒當
此之時內外大權一歸忠賢帝性機巧好馳馬射狐兔水戲
尤好親斧鋸椎鑿髹漆之事積歲不倦每引繩削木時忠賢
輒令王體乾輩奏事帝厭之謬曰朕已悉矣汝輩好為之忠

賢因是得擅威福嘗驟馬過帝前不下帝射殺其馬不謝也
歲必數出坐文軒羽幢青蓋四馬若飛笙鼓鏡吹鳴鏑之聲
轟隱黃埃中錦衣玉帶鞞袴而握刀者夾車左右馳自廚傳
優伶蹴鞠與皂隨者動以數萬望之若鹵簿南遊涿州至琉璃
河祭水歸歷西山碧雲寺謁孫蓮墓士大夫遮道拜伏凡
有章奏其黨遺急足馳請然後下客氏既日夜侍帝所而內
豎自王體乾等外又有李朝欽王朝輔孫進王國秦梁棟等
三十餘人左右擁護外廷文臣則田爾耕許顯純孫雲鶴楊
龍倪文煥主謀議號五虎武臣則田爾耕許顯純孫雲鶴楊
寰崔應元主殺僂號五彪又吏部尚書周應秋太僕少卿曹
欽程等號十狗又有十孩兒四十孫之號而爲呈秀輩門生

者又不可數計自內閣六部至四方總督巡撫徧置死黨獨
心忌張皇后其年秋誣后父張國紀縱奴不法矯中宮旨冀
搖后帝爲致奴法而誚讓國紀忠賢未慊復使順天府丞劉
志選御史梁夢環交發國紀罪狀并言后非國紀女會王體
乾危言沮之乃止其冬三殿成李永貞奏忠賢功吏部尚書
周應秋亦奏如永貞言忠賢遂進上公加恩三等魏良卿時
已晉肅寧侯矣特晉寧國公食其祿如魏國公例再加恩廕
錦衣指揮使一人同知一人工部尚書薛鳳翔奏給賜第已
而太監陶文奏築喜峰隘口成督師王之臣奏築山海城刑
部尚書薛貞奏大盜王之錦獄南京修孝陵工竣甘鎮奏捷
蕃育署丞張永祚獲盜並言忠賢區畫方畧忠賢又自奏三

年緝捕功詔書褒獎半歲中所廢錦衣指揮使四人同知三人僉事一人授其姪希孟世襲錦衣同知甥傅之琮馮繼先並都督僉事而擢崔呈秀弟凝秀爲薊鎮副總兵名器僭濫於是爲極時忠賢建置益廣先使其同類盡鎮薊遼山西宣大諸阨要地總兵梁柱朝楊國棟等歲時賂名馬珍玩勿絕七年春復以崔文昇總漕運李明道總河道胡良輔鎮天津文昇故侍光宗藥爲東林所攻者也海內爭望風獻詔諸督撫大吏聞鳴秦劉詔李精白姚宗文等爭頌德立祠洵洵若不及下及武夫賈豎諸無賴子亦各建祠窮極工巧雕鏤繪畫高插雲漢攘奪民田廬斬伐墓木莫敢控愬而監生陸萬齡至請以忠賢配孔子以忠賢父配啟聖公初潘汝楨首上

疏御史劉之待會藁遲一日卽削籍而薊州道胡士容以不具建祠文遵化道耿如杞入祠不拜皆下獄論死故天下風靡章奏無巨細輒頌忠賢宗室若楚王華烺中書朱愼釜勲戚若豐城侯李永祚廷臣若尚書邵輔忠李養德曹思誠總督張我續及孫國楨張翌明郭允厚楊維和李時馨汪若極何廷樞楊維新陳維新陳爾翼郭如閻郭希禹徐溶輩佞詞累牘不顧羞恥忠賢亦時加恩澤以報之所上疏咸稱厥臣不名大學士黃立極施鳳來張瑞圖票旨亦必曰朕與厥臣無敢名忠賢者忠賢好行小惠每出輒賑賜貧乏修治京南橋梁道路奏蠲天啟六七年香料雜稅愚民每爲所惑山東產麒麟巡撫李精白圖象以聞立極等票旨云厥臣修德故

仁獸至其誣罔若此瑞王惠王桂王帝叔父也忠賢趣令就藩儀物禮數刻意貶損其黨反盛言忠賢能節省爲國家帝卽下詔褒賚前後賜獎勅無筭誥命皆擬九錫文是年自春及秋忠賢冒款汪燒餅擒阿班反羅鍬等功積廕錦衣指揮使至十有七人其族孫希孔希孟希堯希舜鵬程姻戚董芳名王選楊六奇楊祚昌皆至左右都督及都督同知僉事等官又加客氏弟光先亦都督魏撫民又從錦衣改尚寶卿而忠賢志願猶未極會袁崇煥奏寧遠捷忠賢乃令周應秋奏封其從孫鵬翼爲安平伯再敘三大工功封從子良棟爲東安侯加良卿太師鵬翼少師良棟太子太保因徧賚諸廷臣用呈秀爲兵部尚書兼左都御史獨紕崇煥功不錄時鵬翼

良棟皆在襁褓中未能行步也良卿至代天子饗南北郊祭太廟於是天下皆疑忠賢竊神器矣客氏居宮中脅持皇后殘虐宮嬪每出入侍衛赫奕照衢路凡忠賢濁亂朝綱毒痛海內者客氏爲內主也秋八月熹宗崩信王入居宮中王素稔忠賢惡深自儆備及卽位其黨自危楊所修楊維垣先攻崔呈秀以嘗帝主事陸澄原錢元愨員外郎史躬盛遂交章論忠賢帝猶未發於是嘉興貢生錢嘉徵劾忠賢十大罪一並帝二殺后三弄兵四無二祖列宗五剋削藩封六無聖七濫爵八掩邊功九腴民十通關節疏上帝名忠賢使內侍讀之忠賢大懼急以重寶啗信邸太監徐應元求解應元故忠賢博徒也帝知之斥應元十一月遂安置忠賢於鳳陽尋命

逮治忠賢行至阜城聞之與李朝欽偕縊死乃磔其屍懸首河間笞殺客氏於浣衣局魏良卿侯國興客光光等並棄市籍其家客氏之籍也於其家得宮女八人蓋潛拏出外將效呂不韋所爲人尤疾之崇禎二年命大學士韓爌等定逆案始盡逐忠賢黨東林諸人復進用其後溫體仁薛國觀輩相繼柄政潛傾正人爲翻逆案地訖北京覆沒忠賢餘黨漸盡而阮大鍼士英輩與呂大器高弘圖等復分黨局於是三案要典詳詔報復肆毒江左至於滅亡

李永貞通州人萬曆中爲坤寧宮內侍犯法被繫者十八年光宗立得釋復執役坤寧宮魏忠賢用事引其黨諸棟史賓等爲秉筆永貞入棟幕與忠賢掌班劉榮爲死友棟死榮薦

之忠賢令入文書房天啟三年陞司禮秉筆匝月五遷與王體乾石元雅涂文輔共爲忠賢腹心凡章奏入永貞等先閱視鈐識窾要白忠賢議行魏廣微所獻東林點將同志諸錄永貞等各置小冊袖中遇忠賢有處分則爭出袖中冊告曰此某錄中人也以故諸正人無得免者永貞性貪很自體乾以下往往相忿爭督三殿工治信王邸所侵沒金錢無算莊烈帝初立永貞陽引退行金體乾及司禮王永祚王本政各五萬求援三人者畏永貞反覆自首於帝永貞愈懼遂亡去會有旨謫顯陵淨軍其兄成求永貞不得縊死旣而獲永貞改謫鳳陽尋以僞草李實奏逮入京伏誅

劉若愚司禮監陳矩名下也善書好學有文魏忠賢初屏居

私第李永貞取入內直房主筆札永貞多密謀若愚心識之而已不敢與外廷通忠賢敗若愚爲御史楊維垣所劾充孝陵淨軍已御史劉重慶以李實誣高攀龍等七人事劾實實辨疏係空印乃忠賢逼取之令永貞填書者莊烈帝驗疏墨果壓朱遂誅永貞并坐若愚大辟久之始得減等若愚當忠賢時祿賜未嘗一及旣幽囚痛已之冤抑而恨王體乾涂文輔石元雅輩之得漏網也作酌中志以自明凡四卷二十三條

涂文輔魏忠賢黨也初爲客氏子侯國興授讀天啟元年選入詔附魏忠賢用爲司禮秉筆太監歷掌御馬監總督太倉節慎二庫奪故寧安長公主第爲解署曰戶工總部出入騶

從常數百人部郎以下皆庭參無敢違者勢倖出羣奄上莊烈帝立復附徐應元尋謫南京死崔文昇鄭貴妃宮中近侍也光宗立夤緣陞司禮監秉筆掌御藥房貴妃進美女四人帝幸焉旣而有疾文昇以大黃下之疾益劇不復視朝外廷洵洵皆疑文昇受貴妃指謀危帝給事中楊漣言陛下哀毀之餘萬幾勞瘁文昇宜補而伐用藥乖誤又構造流言謂侍御蠱惑所致旣益陛下之疾又損令名陛下奈何置賊臣肘腋間哉未幾帝服鴻臚丞李可灼紅丸遂崩言者交攻可灼及閣臣方從哲惟御史鄭宗周焦源溥馮逢臯傅宗龍李希孔少卿高攀龍直斥文昇而給事中魏大中御史吳甡謂文昇罪浮可灼下廷議可灼坐充軍文昇謫南京而已及魏忠

賢柄政召文昇總督漕運兼管河道崇禎元年撤回御史吳煥復劾之言文昇引進可灼罪在不赦又爲逆賢心腹控扼江淮擅繫紳士剝軍虐民幾致大亂宜亟置重典疏甫上文昇卽結同黨伏官門號哭聲徹御座帝大怒立逮文昇及其黨各杖一百發充孝陵淨軍

王體乾昌平州人諛佞柔辟中深阻不測熹宗初爲尚膳太監遷司禮秉筆兼掌御用監事天啓元年五月司禮掌印太監盧受被謫王安以次當代安以病辭體乾急謀於客魏攘其位而置安於死由此一意附忠賢爲之盡力故事司禮掌印者在東廠上體乾獨避忠賢處其下故忠賢一無所忌得遂其兇謀楊漣劾忠賢疏上帝使體乾誦之體乾視疏中

招權罔上等語皆置不讀帝遂切責漣工部郎中萬燝被杖體乾屬錦衣使田爾耕痛杖之燝委頓又被羣璫擊竟死寧安長公主子李承恩忤忠賢下獄體乾奉勅熱審答承恩其阿媚多若此忠賢不識字體乾與李永貞等爲謀主遇票紅文書及改票動請御筆體乾獨奏忠賢默不言也及忠賢冒陵工殿工邊功等賞賚體乾與永貞梁棟輩均受爵蔭一門錦衣官各數人嘗疑選人錢受益黃願素爲翰林錢謙益御史黃尊素之弟欲并禁錮聞者嗤之莊烈帝立體乾尚掌司禮監逆案成坐諂附革職籍其家

張彝憲初爲司禮太監莊烈帝卽位時懲魏忠賢禍敗盡撤諸方鎮守中官委任大臣旣而以廷臣競門戶兵敗餉絀不

能贊一策乃復思用內侍崇禎三年九月同日遣四人監視邊鎮王坤宣府劉文忠大同劉允中山西彝憲以有心計令鈞校戶工二部出入發帑金爲建署名曰戶工總理其權視外總督內團營提督焉給事中宋可久馮元颺宋鳴梧李世祺常自裕吳南瀨阮震亨御史姜思睿李柄張應辰刑部主事杜麟徵皆言用刑餘之人大辱國主事馮元颺言卽用毋令得薦舉帝悉不聽吏部尚書閔洪學率朝臣具公疏爭帝曰苟羣臣殫心爲國朕何事乎內臣莫敢對南京侍郎呂維祺上疏責輔臣不能匡救大學士周延儒等因請撤還禮部侍郎李孫宸亦以召對力奏帝俱不能用也而給事中魏呈潤南京御史李曰輔至以論內臣被譴由是彝憲遂按行兩

部踞尚書公座勅郎中以下謁見工部侍郎高弘圖不爲下抗疏乞歸削籍去主事金鉉亦以爲言旋以他事斥去彝憲愈驕縱凡邊鎮請軍器故勒不發管益甲主事孫肇興等恐軍需遲滯因劾其悞國奉旨令回奏罪至遣戍南京主事周鑣亦切諫立命褫職七年春朝覲彝憲請令天下官親投會計冊山西提學僉事袁繼咸極言不可弗聽其夏彝憲期工部尚書周士樸批發太僕寺金士樸不赴帝詰之士樸曰臣堂上官不宜下行監督事且不敢廢太祖制未幾士樸竟罷去明年八月帝下詔曰往以廷臣不職故委寄內侍今兵制粗立軍餉稍清其盡撤監視總理彝憲乃入直內廷又明年命守備南京尋卒

高起潛內侍中稍號知兵帝委任之崇禎五年孔有德耿仲明據登州反命起潛偕其同官呂直督諸將金國奇祖大弼等軍東征名曰監視明年賊平還京時流賊大熾命太監陳大金周思印謝文舉孫茂霖等爲內中軍分入大帥曹文詔左良玉張應昌諸營名曰監軍其在邊鎮者悉名監視起潛亦出監寧錦諸軍已而諸內監多侵尅軍資臨敵輒擁精兵先遁諸將緣是皆無功八年詔盡撤諸鎮內臣惟起潛監視如故九年七月

大清兵從天壽山後踰山大入帝復遣太監李輔國許進忠等分守紫荊倒馬諸關孫惟武劉元斌防馬水河兵部尚書張鳳翼出督援軍宣大總督梁廷棟亦引兵南特命起潛爲

總監給帑金三萬賞功牌千以司禮大監張雲漢韓贊周副之九月

大清兵還出冷口起潛不敢近去四日乃入石門割死人首三級報功明年起潛行部視師令監司以下悉用軍禮見永平道劉景耀關內道楊于國疏爭被黜十一年冬京師被兵宣大總督盧象昇入援與兵部尚書楊嗣昌議事不合起潛比嗣昌亦與象昇左致象昇孤軍戰沒起潛又匿不言狀朝士疾之十七年闖賊日急帝仍令監寧前諸軍中道棄關走福王立江南召爲京營提督後降於

大清

王承恩太監曹化淳名下也累官司禮秉筆太監崇禎十七

年三月李自成犯闕帝命承恩提督京營是時事勢已去城
陣守卒寥寥賊架飛梯攻西直平則德勝三門而自成設座
彰義門外秦晉二王左右席地坐太監杜勲者鎮宣府降賊
方侍自成呼城上人請入城見帝承恩與監視太監曹化淳
等絕之上同入大內勲盛稱賊勢請帝自爲計諸內臣請留
勲勲曰賊挾二王爲質不反則二王危乃縱之出復絕下語
守城諸璫曰吾曹富貴固在也兵部尚書張縉彥奏言化淳
等將賊勲夜縋入疑有奸乞立賜推問帝召對手書遣縉彥
上城按之縉彥詰勲安在化淳等云勲事已奏聞拂衣徑去
承恩見賊坎墻急發砲擊之連斃數人而化淳等飲酒自若
帝召承恩令亟整內官備親征時彰義門啓賊盡入或曰

化淳獻之夜分內城陷天將曙帝崩於壽皇亭承恩卽自縊
其下福王時諡忠愍

本朝賜地六十畝建祠立碑旌其忠附葬故主陵側初帝疑
廷臣不足辦賊悉以內侍分守各鎮監視九門迨賊至各鎮
及守門諸大璫皆降無何我

大清兵大破自成於山海關自成奔入京令羣賊各執守城
白楊杖盡逐諸內豎無貴賤皆號泣徒跣敗面流血走出京
城門賊遂捆載諸璫及勲戚大臣家金帛珠寶以億萬計亟

西遁

方正化山東人崇禎時爲司禮太監十五年冬畿輔被兵命
總監保定軍務有全城功已而撤還十七年二月復命出鎮

正化頓首辭帝不許又頓首曰奴此行萬無能為不過一死報主恩爾帝亦垂涕遣之既至與同知邵宗元等登陴共守有請事者但曰我方寸已亂諸公好為之及城陷擊殺數十人賊問若為誰厲聲曰我總監方公也賊攢刀斫殺之其從奄皆死時內臣殉難者更有故司禮掌印太監高時明司禮秉筆太監李鳳翔提諸監局太監褚憲章張國元四人督東廠太監王之心家最富既降賊賊勒其貲拷死南渡時建旌忠祠祀諸死難者以王承恩為正祀內臣正化等附祀而之心亦濫與焉

明史藁

列傳第一百七十九終

明史藁

列傳第一百八十

光祿大夫 經筵講官明史總裁戶部尚書加七級臣王鴻緒奉 敕編撰

佞倖

紀綱 門達逢 杲 李孜省

繼曉 江彬許 泰 錢寧

陸炳 邵元節 陶仲文

顧可學

漢史所載佞幸如籍孺閎孺鄧通韓嫣李延年董賢張放之屬皆以宦寺弄臣貽譏千古未聞以武夫健兒貪人酷吏方技雜流任親暱承寵渥於不衰者也明興創設錦衣衛典親

軍暱居肘腋成祖卽位知人不附已欲以威讐天下特任紀綱爲錦衣寄耳目綱刺廷臣陰事以希上旨帝以爲忠親若肺腑被其殘殺者不可勝數錦衣衛之禍殆與明終始矣降至英宗門達達魯之徒並見親信方之於綱實爲同轍憲宗卽位李孜省僧繼曉以祈禱被寵任萬安尹直彭華等至因之以得高位武宗日事巡遊忘乃國恤一時宵人並起錢寧以錦衣幸滅賢以伶人幸江彬許泰以邊將幸馬昂以女弟幸禍流中外宗社幾墟世宗入繼大統宜矯前軌乃任陸炳於從龍寵郭勛於議禮而一時方士如陶仲文邵元節藍道行之輩紛然並進玉杯牛帛詐妄滋興凡此諸人口銜天憲威福在手天下士大夫靡然從風雖以成祖世宗英武聰察

謹嬖任釀亂幾與昏庸失道之主同其蒙蔽彼第以親已爲可信而孰知其害之至於極也作佞幸傳至顧可學盛端明朱隆禧之屬皆起家甲科致位通顯乃以祕術干榮爲世戮笑此亦佞幸之尤者附之篇末用以示戒云

紀綱臨邑人爲諸生燕王起兵過其縣綱叩馬請自効王大語悅之綱善騎射便辟詭黠善鈎人意嚮先發以爲功王大愛幸授忠義衛千戶旣卽帝位擢錦衣衛指揮使令典親軍司詔獄都御史陳瑛滅建文朝忠臣數十族親屬被戮者數萬人綱覘帝指廣布校尉日摘臣僚及民間陰事以聞帝悉下綱治深文誣詆帝以爲忠親之若肺腑擢都指揮僉事仍掌錦衣用指揮莊敬袁江千戶王謙李春等爲羽翼誣逮浙

江按察使周新致之死帝所怒內侍及武臣下綱論死輒將
至家洗浴好飲食之陽爲言見上必請赦若罪誘取金帛且
盡忽刑於市數使家人僞爲詔下諸方鹽場勒鹽四百餘萬
還復稱詔奪官船二十牛車四百輛載入私第弗予直構陷
大賈數十百家於獄中罄其貲乃已詐取交趾使珍奇奪吏
民田宅籍故晉王吳王乾沒金寶通計所入數百萬服王冠
服高坐置酒命優童奏樂奉觴呼萬歲器物僭乘輿欲買一
女道士爲妾都督薛祿先得之遇祿大內持釵碎祿首腦裂
幾死恚都指揮啞失帖木不避道坐以冒賞事捶殺之腐良
家子數百人充左右詔選妃嬪試可令薨出待年綱輒錄其
尤者內之別室吳中故大豪沈萬三富敵國洪武時論死籍

沒所漏貲尚富其子文度蒲伏見綱進黃金及龍角龍文被
奇寶異錦願得備外府歲時供奉綱許之乃令文度求索吳
中好女文度因挾綱勢什五而中分之綱又多蓄亡命造刀
甲弓弩萬計端午帝射柳綱屬鎮撫龐瑛曰我故射不中若
折柳鼓譟以覘衆意瑛如其言無敢糾者綱喜曰是無能難
我矣遂謀不軌十四年七月中貴讐綱者白發其端命給事
御史廷劾下都察院按治具有狀卽日磔綱於市家屬無少
長咸戍邊列罪狀頒示天下其黨敬江謙春瑛等誅譴有差
門達豐潤人襲父職爲錦衣衛百戶性機警沉鷲正統末以
指揮呂貴薦進千戶理鎮撫司刑久之遷指揮僉事坐累解
職景泰七年復故官佐理衛事兼鎮撫理刑天順改元與奪

門功進指揮同知旋進指揮使專任理刑千戶謝通者浙江人也佐達理司事用法仁恕達倚信之重獄多平反有罪者以下禁獄為幸朝士翕然稱達賢然是時英宗慮廷臣黨比欲知外事倚錦衣官校為耳目由是達杲得大幸達反為之用達杲者安平人也始任錦衣衛校尉達及指揮劉敬倚為腹心帝復嬖杲與奪門功帝大治奸黨杲縛錦衣百戶楊瑛指為張永親屬又執千戶劉勤於朝奏其誄上兩人並坐誅用楊善薦授本衛百戶以捕妖賊功進副千戶又用曹吉祥薦擢指揮僉事帝以杲強鷲委任之杲乃撫羣臣細故以稱帝旨英國公張懋太平侯張瑾外戚會昌侯孫繼宗兄弟並侵官田杲劾奏還其田於官懋等皆服罪乃已石亨恃寵不

法帝漸惡之杲即伺其陰事亨從子彪有罪下獄命杲偕僉都御史王儉赴大同械其黨都指揮朱諒等七十六人杲因發彪弟慶他罪連及者皆坐杲進指揮同知明年復奏亨怨望懷不軌亨下獄死有詔盡革奪門功達杲言臣等俱特恩非以亨故帝優詔留任以杲發亨奸益倚任杲杲益發舒勢出達上白遣校尉偵事四方文武大吏富家高門多進伎樂貨賄以祈免親藩郡王亦然無賄者輒執送達鍛鍊成獄天下朝覲官大半罹罪逮一人數大家立破四方奸民詐稱校尉乘傳縱橫無所忌彭城伯張瑾以殯妻稱疾不朝而與諸公侯飲私第杲劾奏幾重得罪杲所遣校尉報寧府弋陽王奠璽母子淫亂帝遣官往勘白其誣寧王奠培等亦言無左

驗帝怒責杲杲執如初帝竟賜奠監母子死方昇屍出大雷
雨平地水數尺衆始知其冤指揮使李斌嘗陷弘農衛千戶
陳安於獄縊殺之安家訴冤下巡按御史邢宥覆讞石亨令
按察使王傑囑宥薄斌罪贖絞還職至是校尉言斌素藏妖
書謂其弟健富有大位欲陰結外蕃爲石亨報讐杲以聞下
錦衣獄達坐斌謀反帝兩命廷臣會訊畏杲不敢平反斌兄
弟宣極刑坐死者二十八人沒入爲奴婢者四十六人杲本
由石亨曹吉祥進訐亨致死復奏吉祥及其從子欽陰事吉
祥父子大恨五年七月欽反入杲第斬之取其首以去事平
贈杲指揮使給其子指揮僉事俸時達已掌衛事仍兼理刑
杲被殺達以守衛功進都指揮僉事初杲給事達左右及得

志恣甚達怒力逐之杲旋復官欲傾達達惴惴不敢縱杲死
達勢愈張欲踵杲所爲益布旗校於四方告訐者日盛中外
重足立帝益以爲能外戚都指揮孫紹宗及軍士六十七人
冒討曹欽功達發其事紹宗被責讓餘悉下獄盜竊戶部山
西司庫金巡城御史徐茂劾郎中趙昌主事王珪徐源疎縱
達治其事皆下獄謫官達以囚多獄舍少請城西武邑庫隙
地增置之報可御史樊英主事鄭瑛犯贓罪給事中趙忠等
報不以實達劾其徇私亦下獄謫官給事中程萬里等五人
直登聞鼓有軍士妻愬冤會齋戒不爲奏達劾諸人蒙蔽詔
卽下達治已劾南京戶部侍郎馬諒左都御史石璞掌前府
忻城伯趙榮都督同知范雄張斌老贖皆罷去裕州民奏知

州秦永昌衣黃衣閱兵帝怒命達遣官覈籍其貲戮永昌榜示天下并逮布政使侯臣按察使吳中以下十人及先後巡按御史吳玘等四人下詔獄臣等停俸玘等謫縣丞御史李蕃按宣府或告蕃擅撻軍職用軍容送迎下達治枷死長安門外御史楊璉按遼東韓祺按山西校尉言其妄作威福建至京祺亦枷死校尉又言陝西督儲參政婁良用大杖督賦水浸火炙而撻之遂徵良下吏輸贖還職湖廣參議李孟芳陝西按察使錢博福建僉事包瑛陝西僉事李觀四川巡按田斌雲南巡按張祚清軍御史程萬鍾及刑部郎中馮維孫瓊員外郎貝鈿給事中黃甄皆爲校尉所發下獄瑛守官無玷不勝憤自縊死其他多遣戍湖廣諸生馬雲罪黜詐稱錦

衣鉅撫奉命葬親布政使孫毓等八人咸賻祭事覺法司請逮問毓等服罪乃已卒不罪雲達初欲行督責之術其同列呂貴曰武臣不易犯曹欽可鑒也獨文吏易裁耳達以爲然故文吏禍尤酷都指揮袁彬恃帝舊恩不爲達下達深銜之彬妾父千戶王欽誑人財達廉知之奏請下彬獄法司論彬贖徒還職有趙安者初爲錦衣力士役於彬後謫戍鐵嶺衛赦還改府軍前衛有罪下詔獄達逼安言改補府軍由彬請託故乃復捕彬榜掠誣彬受石亨曹欽賄用官木爲私第索內官督工者輒瓦奪人子女爲妾軍匠楊墳素爲彬所愛擊登聞鼓訟冤語侵達詔并下達治當是時達害大學士李賢寵嘗譖於帝言賢受陸瑜金酬以尚書帝疑之不召者半歲

達又惡賢數規已欲并去之乃拷掠墳教以引賢墳卽謬曰此李學士導我也達大喜立奏聞請法司會鞫墳午門外帝遣中官裴當監視達欲執賢并訊當曰大臣不可辱乃止及訊墳仰曰吾小人何由見李學士此門錦衣教我達色沮不能言彬亦歷數達納賄狀法司畏達不敢聞坐彬絞輸贖墳斬帝命彬贖畢調南京錦衣而禁錮墳明年帝疾篤達知東宮局丞王綸必柄用預爲結納無何憲宗嗣位綸敗達坐調貴州都勻衛帶俸差操甫行言官交章論其罪命逮還羣臣廷鞫論斬繫獄沒其貲鉅萬指揮張山同謀殺人罪如之子序班升從子千戶清壻指揮楊觀及其黨都指揮牛循等九人謫戍降調有差後當審錄命貸達死發廣西南丹衛充軍

卒

李孜省南昌人以布政司吏待選京師賊事發匿不歸時憲宗好方術孜省乃學五雷法厚結中官梁芳錢義以符籙進成化十五年特旨授太常丞御史楊守隨給事中李俊等劾孜省賊吏不宜典祭祀乃改上林苑監丞日寵幸賜金冠法劍及印章二密封奏請益獻淫邪方術與芳等表裏爲奸漸干預政事十七年擢右通政寄俸本司仍掌監事右通政王昶輕之不加禮孜省譖於帝左遷太僕少卿故事寄俸官不得預郊壇分獻帝特以命孜省禮官臺諫懲昶事無敢執奏者初帝踐位踰月卽命中官傳旨用工人爲文思院副使自後相繼不絕內府諸監局及在外浮屠老子之官召入寫道

經佛書書成輒得官左右婪賄無算而梁芳爲甚一傳旨姓名至百十人時謂之傳奉官文武僧道濫恩澤者數千鄧常恩趙玉芝凌中顧珏及繼曉輩皆尊顯與孜省相倚爲奸然權寵皆出孜省下居二年進左通政給事中王瑞御史張稷等交劾之乃貶二秩爲本司左參議他貶黜者又十二人以塞中外之望頃之復遷左通政二十一年正月星變求言九卿大臣給事御史皆論傳奉官之弊首及孜省常恩等帝頗感悟貶孜省上林監丞他冗濫者令吏部錄其名上自勛戚功陞蔭叙外凡五百餘人帝爲留六十七人餘皆斥罷中外大悅孜省緣是恨廷臣甚構逐主事張吉員外郎彭綱而益以左道持帝意其年十月復左通政遂構罪吏部尚書尹旻

及其子侍講龍又假扶鸞術言江西人赤心報國於是致仕副都御史劉敷禮部郎中黃景南京兵部侍郎尹直工部尚書李裕禮部侍郎謝一夔皆因之以進間採時望若學士楊守陳倪岳少詹事劉健都御史余子俊李敏侍郎徐溥李嗣大理卿張錦少卿馮貫通政黃孔昭祭酒劉宣悉密封推薦搢紳進退多出其口執政大臣萬安劉吉彭華從而附麗之通政邊鏞爲僉都御史李和爲南京戶部侍郎皆其力也江西巡撫閔珪洗馬羅璟兵部尚書馬文升順天府丞楊守隨皆其所排擠朝野爲仄目吏部奏通政使缺卽以命孜省而右通政陳政以下五人遞進一官時張文質方以尚書掌司事通政故未嘗缺使也已復擢禮部右侍郎掌通政如故常

恩臨江人王芝番禺人並曉方術常恩因中官陳喜進由道錄司右至靈驟擢太常卿王芝因中官高諒進累官太常丞超授本寺卿丁母憂特賜祭葬大治瑩域制度踰等還朝益與常恩及孜省朋奸珏中不知何許人珏以扶鸞術累官太常少卿喪母賜祭且給贈誥故事四品未三載無給誥賜祭者憲宗特予之吏部尚書尹旻因請并贈其父以省再給未幾進本寺卿其二子經綸亦官太常少卿中以善書供事文華殿不數年爲太常卿踰月以諫官言降寺丞孜省以星變貶常恩亦貶本寺丞而王芝珏中並如故孜省復通政常恩亦復太常卿有李文昌者試術不效杖五十斥還右至靈高宗諒者詐爲丹藥與其黨二人並奪職岳州通判沈政以繪

事夤緣至太常少卿請斂天下貨 充內府用帝怒下詔獄杖謫廣西慶遠通判人頗以爲快然 學好中外蟠結士大夫附羶者日益多進士郭宗由刑部主簿以篆刻爲中人所引擢尚寶少卿日與市井工技伍趨走闕廷兵科左給事中張喜吉謫官用祕術于中官高英達於帝得召見因自陳乞復都給事中士論以爲羞大學士曹 獻房中術以固寵朝士若萬祺倪謙錢溥周洪謨之加侍郎劉焱之加尚書吏部尚書尹旻之加太子太傅諸尚書殷謙周洪謨施純劉焱張鵬張瑩劉昭之加太子少保亦出傳奉而諸雜流加侍郎通政太常太僕尚寶者不可悉數憲宗崩孝宗嗣位始用科道言盡汰傳奉官謫孜省常恩王芝珏中經戍邊衛又以中官

蔣琮言復逮夜省常恩王芝等下詔獄坐交結近侍律斬妻
子流二千里詔免死仍戍邊攷省不勝榜掠瘐死

繼曉江夏僧也憲宗時以祕術因梁芳進授僧錄司左覺義
進右善世命爲通元翊教廣善國師賜袈裟數珠日誘帝爲
佛事建大永昌寺於西市逼徙民居數百家費國帑數十萬
員外郎林俊請斬芳繼曉以謝天下帝下俊錦衣獄謫判姚
州繼曉虞禍及乞歸養母并乞空名度牒五百道帝悉從之
帝初卽位卽以道士孫道玉爲真人其後西番僧劄巴堅參
封爲萬行莊嚴功德最勝智慧圓明能仁感應顯國光教弘
妙大悟法王西天至善金剛普濟大智慧佛其徒劄實巴鎖
南堅參端竹也失皆爲國師錫誥命服食器用僭擬王者出

入乘轎輿衛卒執金吾仗前導錦衣玉食者幾千人取荒塚
頂骨爲數珠鬻骸爲法盃給事中魏元等切諫不納尋進劄
實巴爲法王班卓兒藏卜爲國師又封領占竹爲萬行清修
眞如自在廣善普慧弘度妙應掌教翊國正覺大濟法王西
天圓智大慈悲佛又封西天佛子劄失藏卜劄失堅參乳奴
班丹鎖南堅參法幹領占五人爲法王其他授西天佛子大
國師國師禪師者不可勝計羽流加號真人高士者亦盈都
大國師以上金印真人玉冠玉帶玉珪銀章繼曉尤奸黠竊
權所奏請立從成化二十一年星變言官極論其罪始勒爲
民而諸番僧如故孝宗初詔禮官議汰禮官言大慈恩大隆
善大能仁諸寺法王至禪師四百三十七人刺麻諸僧七百

八十九人華人爲禪師及善世覺義諸僧官一百二十人道士自真人高士及正一演法諸道官一百二十三人請俱貶黜詔法王佛子降國師國師降禪師禪師降都綱自講經以下落職爲僧悉遣還本土追奪誥勅印章儀仗諸法物真人降左正一高士降左演法亦追奪印章及諸玉器僧錄司止留善世等九員道錄司留正一等八員餘皆廢黜而繼曉以科臣林廷玉言速治卒棄市

江彬宣府人初爲蔚州衛指揮僉事正德六年畿內賊起京軍不能制調邊兵彬以大同遊擊隸總兵官張俊過薊州殺一家二十餘人誣爲賊得賞後與賊戰淮上被三矢其一著面鏃出於耳拔之更戰武宗聞而壯之七年賊漸平遣邊兵

還鎮大同宣府軍過京師犒之遂不遣彬因錢寧見帝帝眎矢痕呼曰彬健能爾耶彬狡黠強很貌魁碩有力善騎射談兵帝前帝大悅擢都指揮僉事出入豹房同臥起嘗與帝奕不遜千戶周騏叱之彬陷騏榜死左右皆畏彬彬導帝微行數至教坊司進鋪花氈幄百六十二間制與離宮等帝出遊幸皆御之寧見彬驟進意不平一日帝搏虎召寧寧縮不前虎迫帝彬趨撲乃解帝戲曰吾自足辦安用爾然心德彬而嫌寧寧他日短彬帝不應彬知寧不相容顧左右皆寧黨欲藉邊兵自固因盛稱邊軍驍悍京軍脆弱請互調京邊軍內外操練言官交諫大學士李東陽疏陳十不便皆不聽於是調遼東宣府大同延綏四鎮軍號外四家縱橫都市中每團

練大內間以角觝戲帝戎服臨之與彬聯騎出鎧冑相錯幾不可辨八年命許泰領敢勇營彬領神威營改太平倉爲鎮國府處邊兵建西官廳於奮武營賜彬國姓越二年遷都督僉事彬乃薦萬全都指揮李琮陝西都指揮神周勇略並召侍豹房同賜姓爲義兒毀積慶鳴玉二坊民居造皇店酒肆建義子府又設東西兩官廳於禁中視團營領以泰等四人號義子四鎮軍彬兼統之帝自領羣閹善射者爲一營號中軍晨夕馳逐呼譟聲達九門甲光照宮苑帝時臨閱名過錦諸軍悉衣黃罩甲秦琮周等冠遮陽帽帽植天鵝翎貴者三翎次二翎兵部尚書王瓊得賜一翎自喜甚彬旣心忌寧欲導帝巡幸遠寧因數言宣府樂工多美婦人且可觀邊釁瞬

息馳千里何鬱鬱居大內爲廷臣所制帝然之十二年八月急裝微服出幸昌平至居庸關爲御史張欽所閉不得出乃還數日復夜出先令太監谷大用代欽止廷臣追諫者因度居庸至宣府彬爲建鎮國府第悉輦豹房珍玩女御實其中彬從帝數夜入人家索婦女衛士樵蘇不給毀民廬爲薪而帝樂之忘歸稱曰家裏未幾幸陽和迤北五萬騎入寇諸將王勛等力戰至應州寇引去斬首十六級官軍死數百人以捷聞京師帝自稱威武大將軍朱壽又自稱鎮國公所駐蹕稱軍門中外事無大小白彬乃奏或壅格至二三歲前後切諫者無算悉置不省帝在宣府迎春彬令備百戲飾大車數十輛載諸妓女以羣僧雜坐其中車旣馳諸妓執圓毬交擊

僧妓頭互相觸有墮車下者帝爲大笑十三年正月還京數
念宣府彬復導帝往因幸大同聞太皇太后崩乃還京發喪
將葬如昌平祭告諸陵遂幸黃花密雲掠良家女數十車日
有死者左右不敢白猶載以隨永平知府毛思義忤彬下獄
謫官典膳李恭疏請回鑾指斥彬罪未及上彬聞逮恭死詔
獄帝駐大喜峰口漁獵欲令朶顏三衛花當把兒孫等納質
宴勞御史劉士元陳四不可不報帝旣還下詔曰近來北寇
犯順兵政廢弛特命總督軍務威武大將軍總兵官朱壽統
率六軍期於剪滅命彬爲威武副將軍錄應州功封彬平虜
伯子三人錦衣衛指揮泰安邊伯琮周俱都督陞賞內外官
九千五百五十餘人賞賜億萬計彬又導帝由大同渡黃河

次榆林至綏德幸總兵官戴欽第納其女還由西安歷偏頭
關抵太原大徵女樂有劉良女者晉府樂工楊騰妻也以謳
進遂大寵載歸彬與諸近幸皆母事之稱曰劉娘娘初延綏
總兵官馬昂罷免有女弟善歌能騎射解外國語嫁指揮畢
春有娠矣昂因彬奪歸進於帝召入豹房大寵傳陞昂右都
督弟昺並賜蟒衣大璫皆呼爲舅賜第太平倉給事御史
諫不應帝嘗幸昂第召其妾昂不聽帝怒而起昂復結太監
張忠進其妾杜氏遂傳陞昺都指揮昺儀真守備昂喜過望
又進美女四人謝恩及是納欽女皆彬所導也十四年正月
自太原還至宣府命彬提督十二團營帝東西遊幸歷數千
里乘馬腰弓矢涉險阻冒風雪從者多道病帝無倦容及還

京復欲南幸刑部主事汪金疏陳九不可且極言酣酒當戒
帝不省時帝日夜酣飲羣小利帝昏醉故金切指之帝又自
稱總督軍務威武大將軍太師鎮國公降勅南幸廷臣百餘
人伏闕諫彬故激帝怒悉下獄多杖死者彬亦意沮議得寢
會寧王宸濠反復贊帝親征下令諫者處極刑命彬提督贊
畫機密軍務兼督東廠錦衣官校辦事是時張銳治東廠錢
寧治錦衣彬兼兩人之任權勢莫與比遂扈帝以行尋間止
寧令董皇店役寧不得從八月發京師至保定巡撫伍符行
酒爲藏鬪戲符探得鬪帝不悅投之地飲符數瓢符醉乃大
笑至臨清山東守臣進宴宴具草略帝哂曰何慢我也及宴
巡撫王珣獻觴步緩帝曰之神周因林珣明日復宴治河都

御史龔弘恐帝悞以爲珣自言姓名彬從旁厲聲叱之龔并
罪二人帝不爲動乃已初帝之南發也劉姬疾不從約以玉
簪召帝渡蘆溝橋馳馬失簪大索數日不得至臨清遣使召
姬姬以無信約不肯行帝倉皇自乘單舸疾歸載姬俱南道
遇參議林文纘舟見其妾美卽奪去十一月至徐州彬先飾
龍舟以迎旌旂蔽天順流東下漁清江浦再漁汜光湖者累
日彬矯旨動輒縛長吏通判胡琮懼自縊死十二月至揚州
卽民居爲都督府遍刷處女寡婦實之有愧忿自經者帝數
獵城西命神周取鷹犬泰州卽東循草場大獵以劉姬諫稍
止復漁於儀真新聞中官張雄等選妓至親閱之取其半入
舟至南京十五年正月迎春備諸戲如宣府彬率邊兵數萬

跋扈甚成國公朱輔爲長跪魏國公徐鵬舉及公卿大臣皆側足事之惟參贊尚書喬宇應天府丞寇天敘挺身與抗彬氣稍沮六月幸牛首山諸軍夜驚言彬欲爲逆久之乃定彬又欲導帝幸蘇州下浙江抵湖湘南京諸臣伏闕極諫彬欲激帝怒重譴之其黨勸沮乃止時宸濠就擒繫江上舟中民間數訛傳將爲變帝心疑欲歸閏八月發南京至清江浦漁積水池舟覆被溺遂得疾初車駕之西巡也大星隕地震黑霧晦冥入太廟風雷大作燭盡滅宣府大冰雹如盤甌及將南征陰霾晝晦禁中水溢壞橋下鐵柱及在南京有物綠色如猪首墮帝前其拘留婦人之所滿壁若人頭倒懸者彬恬不爲意十月帝至通州彬尚欲勸帝幸宣府矯旨召勳威大

臣議宸濠獄又上言賴鎮國公朱壽指授方略擒宸濠逆黨申宗遠等十五人乞明正其罪乃下詔褒賜鎮國公歲加彬祿米百石廕一子錦衣千戶會帝體憊甚左右力請還京彬議乃寢至京矯旨改團練營爲威武團練營自提督軍馬令秦周琮等提督教場操練及帝崩大學士楊廷和用遺命分遣邊兵罷威武團練營彬內疑稱疾不出陰布腹心衷甲觀變令秦詣內閣探意廷和以溫語慰之彬稍安乃出成服廷和密與司禮中官魏彬計因中官溫祥入白太后請除彬會坤寧宮安獸吻卽命彬與工部尚書李鏊入祭彬禮服入家人不得從事竟將出中官張永留彬鑊飯宫外太后遽下詔收彬彬覺亟出至西安門門閉尋走北安門門者曰有旨留

提督彬曰今日安所得旨排門者門者擁之遂被執拔其鬚且盡收者至縛之有頃周琮並縛至罵彬曰奴早聽我豈爲人擒世宗卽位傑彬於市周琮與彬子勳杰鰲熙俱斬繪處決圖榜示天下妻楊幼子然女千金萬金貴金發功臣家爲奴時京師久旱遂大雨籍彬家得黃金七十櫃白金二千二百櫃他珍瑤不可數計泰江都人都督寧子襲職爲羽林前衛指揮使中武會舉第一擢署都指揮同知尋充副總兵協守宣府正德六年與邵永江彬俱調勦流賊敗賊霸州追敗之東光半壁店未幾復敗賊棗強皆楊虎黨也劉六寇曹州泰與馮楨邵永擊却之乘勝擒斬千八百人賊犯蓋縣臨城泰等不敢擊被劾停俸旣而賊奔衛輝泰爲所敗總督陸完

以聞降勅切責完復劾其調赴萊陽逗留不進詔革署都督僉事新銜仍以都指揮同知辦賊賊平進署都督同知留京師與彬日侍左右賜國姓歷遷左都督冒應州功封安邊伯宸濠反帝以泰爲威武副將軍偕中官張忠率禁軍先往宸濠已爲王守仁所擒泰欲攘其功疾馳至南昌窮搜逆黨士民被誣陷者不可勝計誅求刑戮甚於宸濠之亂嫉守仁功排擠之百方執伍文定窘辱備至居久之始旋師世宗卽位廷臣交劾文定亦備以虐民妒功狀上聞下獄論死夤緣貴近減死徙邊馬昂亦罷吳等戍邊

錢寧不知所出或云鎮安人幼鬻太監錢能家爲奴能嬖之冒錢姓能死推恩家人得爲錦衣百戶正德初曲事劉瑾得

幸於帝性獯狡又善射拓左右弓帝喜賜國姓爲義子傳陞錦衣千戶瑾敗以計免歷指揮使掌南鎮撫司累遷左都督掌錦衣衛事典詔獄言無不聽其名刺自稱皇庶子引樂工臧賢回回人于永及諸番僧以祕戲進請於禁內建豹房新寺恣聲伎爲樂復誘帝微行帝在豹房常醉枕寧臥百官候朝至晡莫得帝起居密伺寧寧來則知駕將出矣太監張銳領東廠緝事橫甚而寧典詔獄勢最熾中外稱曰廠衛有校尉閔三法司道上司務林華出不避華杖之校尉語不遜評事沈光大杖繫之寧奏華光大不敬逮下錦衣獄黜光大貶華一級錦衣千戶王注與寧暱撻人至死員外郎劉秉鑑持其獄急寧匿注於家而屬東廠發刑部他事尚書張子麟亟

造謝寧立釋注乃已廠衛校卒至部院白事稱尚書子麟輩曰老尊長太僕少卿趙經初以工部郎督乾清宮工乾沒帑金數十萬經卒寧佯遣校尉治喪迫經妻子扶櫬出姬妾帑藏悉據有之中官廖堂鎮河南橫甚弟錦衣指揮鵬肆惡爲巡撫鄧庠所劾詔降級安置鵬懼使其嬖妾私事寧得留任寧每休沐必宿鵬妾家寧造佛寺於石經山窮極壯麗子永安六歲爲都督養子錢傑錢靖等俱冒國姓授錦衣衛官念富貴已極帝無子思結強藩自全爲寧王宸濠營復護衛又遣人往宸濠所謂帝星已明王有異相事必成成則已封公如徐達而推兵部尚書王瓊如李善長寧又令宸濠數進金銀玩好於帝謀名其世子司香太廟爲入嗣地又以玉帶絲

紆附其典寶萬銳歸詐稱上賜凡宸濠所遣私人行賄京師皆主伶人臧賢家由寧以達帝左右宸濠反帝心疑寧寧懼白帝收宸濠所遣盧孔章而歸罪賢謫戍邊行未百里使校僞爲盜殺賢以滅口又致孔章瘐死冀得自全然卒中江彬計使董皇店役彬在道盡白其通逆狀帝曰黠奴我固疑之遂羈寧臨清馳收其妻子家屬帝還京裸縛寧籍其家得玉帶二千五百束黃金十餘萬兩白金三千箱胡椒數千石世宗卽位磔寧於市養子傑等十一人皆斬子永安幼免死妻李氏妾劉耐驚張碧桃何碧杏侍兒玉寶瓶劉牡丹發功臣家爲奴

陸炳其先平湖人祖塋以軍籍隸錦衣衛爲總旗父松襲塋職從興獻王之藩安陸選爲儀衛司典仗事世宗於潛邸及世宗入承大統松以從龍恩遷錦衣副千戶累官後府都督僉事協理錦衣事世宗始生松妻爲乳媪又三年炳生攜入宮中稍長日侍左右炳武健沉鷲長身火色行步類鶴人見而畏之舉嘉靖八年武會試授錦衣副千戶松卒襲指揮僉事尋進署指揮使掌南鎮撫司十八年二月帝南巡至衛輝夜四更行宮火從官倉猝不知帝所在炳負帝出御乘輿帝自是愛幸炳屢擢都指揮同知遂代陳寅掌錦衣事帝初嗣位掌錦衣者朱宸未久罷代者駱安安罷代者王佐佐有賢聲大猾劉東山訐張鶴齡兄弟賴佐得保全佐卒代者陳寅佐寅皆侍興邸以從龍恩見用寅亦謹厚不爲惡安佐寅皆

居職八年至炳權勢乃熾遠出諸人上未幾擢署都督僉事又以緝捕功擢都督同知炳驟貴其同列多父行炳陽敬事之徐以計去其易已者又能得宰相夏言嚴嵩歡以故日益重嘗捶殺兵馬指揮爲御史所糾詔不問言故暱炳一日御史劾炳諸不法事言卽擬旨逮治炳窘行三千金救解不得長跪泣謝罪乃已炳自是疾言次骨及嵩與言構炳助嵩發言與邊帥關節書言罪死嵩德炳恣其所爲引與籌畫關通賕賂後仇鸞得寵凌高出其上獨憚炳炳曲奉之不敢與鈞禮而私出金錢結其所親愛得鸞陰私及鸞病亟炳盡發其不軌狀帝大驚立收鸞勅印鸞憂懼死至剖棺戮屍炳先進左都督錄擒哈丹兒功加太子太保以發鸞密謀加少保兼

太子太傅歲給伯祿三十三年命入直西苑與嚴嵩朱希忠等供奉焚修出乘肩輿入則馳馬三十五年三月賜進士恩榮宴故事內閣尚書都御史上坐錦衣列於西帝以炳故特令居二品之末明年疏劾司禮中官李彬侵盜工所物料及內府銀錢數千萬私役軍士營墳墓僭擬山陵帝怒下彬鎮撫司與其黨杜泰等三人論斬籍其貲銀四十餘萬金珠珍寶無算尋加炳太保兼少傅掌錦衣如故三公無兼三孤者僅於炳見之炳任豪惡吏爲爪牙悉知民間銖兩奸富人有小過輒收捕沒其家積貲數百萬營別宅十餘所分置妾媵其中鐘鼓帷帳不移而具莊園通四方勢傾天下嚴嵩父子盡攬六曹事炳無所不關說文武大吏爭走其門歲入不貲

結權要周旋善類亦無所吝帝數起大獄炳多所保全折節士大夫未嘗構陷一人以故朝士無甚惡之者三十九年卒官帝哀悼贈忠誠伯諡武惠祭葬有加官其子繹爲本衛指揮僉事命都督朱希孝經紀喪事護其家隆慶初用御史言下法司窮治削炳秩籍沒其產奪繹及弟太常少卿煒官坐贓數十萬繫繹等追償久之貲盡萬曆三年繹上章乞免張居正等言炳救駕有功且律非謀反叛逆奸黨無籍沒者况籍沒者不追贓追贓者不籍沒今二罪並坐非律意帝憫之遂獲免

邵元節貴溪人也幼喪父母出家爲龍虎山上清宮道士從其師范文泰受龍圖龜範元始太虛之學又師事李伯芳黃太初咸盡其術寧王宸濠召之辭不往放浪江湖間世宗嗣位惑內侍崔文等言好鬼神說日事齋醮諫官屢以爲言不納嘉靖三年徵元節入京見於便殿大加寵信俾居顯靈宮專司禱祀雨雪愆期禱有驗封爲清微妙濟守靜修真凝元衍範志默秉誠致一真人統轄朝天顯靈靈濟三宮總領道教錫金玉銀象印各一六年乞還山詔許馳傳未幾趨朝有事南郊命分獻風雲雷雨壇預宴奉天殿班二品贈其父太常丞母安人并贈文泰真人賜元節紫衣玉帶給事中高金論之帝怒下金詔獄勅建真人府於城西以其孫啓南爲太常丞曾孫時雍爲太常博士歲給元節祿百石以校尉四士人供灑掃賜莊田三十頃蠲其租又遣中使建道院於貴溪

賜名仙源宮既成乞假還山中途上奏言爲大學士李時弟員外敗所侮時上章引罪敗下獄獲譴比還朝舟至潞河命中官迎入賜以蟒服及闡教輔國王印帝旣深信道教頗抑釋氏十四年夏大興隆寺災不復重建移僧錄司於大隆善寺禁諸僧修齋俗事燬禁中元時所造大善佛殿金銀淫褻諸佛像一百九十六座其重萬三千餘斤以其地建太后宮先是以皇嗣未建數命元節建醮以夏言爲監禮使文武大臣日再上香越三年皇子疊生帝大喜數加恩元節拜禮部尚書賜一品服孫啓南徒陳善道等咸進秩贈伯芳太初爲真人帝幸承天元節病不能從無何死帝爲出涕贈少師賜祭十壇遣中官錦衣護喪還有司營葬用伯爵禮禮官擬諡

榮靖不稱旨再擬文康帝遂兼用之曰文康榮靖啓南官至太常少卿善道亦封清微闡教崇真衛道高士隆慶初削元節秩諡

陶仲文初名典真黃岡人好神仙方術嘗受符水訣於羅田萬玉山與邵元節善嘉靖中由黃梅縣吏爲遼東庫大使秩滿需次京師寓元節邸舍元節年老宮中黑靑見治不效因薦仲文於帝以符水喫劍絕宮中妖莊敬太子患痘禱之而瘥帝深寵異十八年南巡元節病以仲文代次衛輝有旋風繞駕帝問此何祥也對曰主火是夕行宮果火宮人死者甚衆帝益異之授神霄保國宣教高士尋封神霄保國弘烈宣教振法通真忠孝秉一真人明年八月欲令太子監國專事

靜攝太僕卿楊最疏諫杖死廷臣震懾大臣爭諂媚取容神
仙禱祠日亟以仲文子世同爲太常丞子壻吳濬從孫良輔
爲太常博士帝有疾旣而瘳喜仲文祈禱功特授少保禮部
尚書久之加少傅仍兼少保仲文起筦庫不二歲登三孤恩
寵出元節上乃請建雷壇於鄉縣祝聖壽以其徒臧宗仁爲
左至靈馳驛往督黃州同知郭顯文監之工稍稽謫顯文典
史遣工部郎何城代督趣甚急公私騷然御史楊尚郎中劉
魁言及之給事中周怡陳時事有日事禱祠語帝大怒悉下
詔獄拷掠鋼之十年吏部尚書熊浹諫此卽卽削其籍自是
中外爭獻符瑞焚修齋醮之事無敢指及之者矣帝自二十
年遭宮婢變移居西苑日求長生郊廟不親朝講盡廢君臣

不相接獨仲文得時見見輒賜坐稱之爲師而不名心知臣
下必議已每下詔旨多憤疾之辭廷臣莫知所措小人顧可
學盛端明朱隆禧輩皆緣以進其後夏言以不冠香葉冠積
他釁至死而嚴嵩以虔奉焚修蒙異眷者二十年大同獲謀
者王三帝歸功上元加仲文少師仍兼少傅少保一人兼領
三孤唯仲文而已久之授特進光祿大夫柱國兼支大學士
俸廕子世恩爲尚寶丞復以聖誕加恩給伯爵俸授其徒郭
弘經王永寧爲高士時都御史胡纘宗下獄株連數十人二
十九年春京師災異頻見帝以咨仲文對言慮有冤獄得雨
方解俄法司上纘宗等爰書帝悉從輕典果得雨乃以平獄
功封仲文恭誠伯歲祿千二百石弘經永寧封真人仇鸞之

追戮也下詔稱仲文功增歲祿百石廕子世昌國子生三十
二年仲文言齊河縣道士張演昇建大清橋濬河得龍骨一
重千斤又突出石沙一脉長數丈類有神相臣已助募萬五
千金乞佐以內帑帝卽發銀如仲文所募時建元嶽於湖廣
太和山旣成遣英國公張溶往行安神禮仲文偕顧可學建
醮祈福明年聖誕加恩廕子錦衣百戶帝益求長生日夜禱
祠簡文武大臣及詞臣入直西苑供奉青詞詞臣皆舍本業
工巫覡詞以取媚四方奸人段朝用龔可佩藍道行王金胡
大順藍田玉之屬咸以燒煉符咒熒惑天子然不久皆敗獨
仲文恩寵日隆久而不替士大夫或緣以進又創二龍不相
見之說青宮虛位者二十年三十五年上皇考道號爲三天

金闕無上玉堂都仙法主玄元道德哲慧聖尊開真仁化大
帝皇妣號爲三天金闕無上玉堂總仙法主玄元道德哲慧
聖母天后掌仙妙化元君帝自號靈霄上清統雷元陽妙一
飛玄真君後加號九天弘教普濟生靈掌陰陽功過大道思
仁紫極仙翁一陽真人元虛圓應開化伏魔忠孝帝君再號
太上大羅天仙紫極長生聖智昭靈統元證應玉虛總掌五
雷大真人玄都境萬壽帝君明年仲文有疾乞還山獻上歷
年所賜蟒王金寶法冠及白金萬兩旣歸帝念之不置遣錦
衣官存問命有司以時加禮改其子尚寶少卿世恩爲太常
丞兼道錄司右演法供事真人府仲文得寵二十年位極人
臣然小心慎密不敢恣肆三十九年卒年八十餘帝聞痛悼

葬祭視邵元節特謚榮康惠肅世恩後至太常卿隆慶元年坐與王金偽製藥物下獄論死仲文秩謚亦追削段朝用合肥人以燒煉干郭勛言所化銀器盛食今欲設二親几筵上不得及一日帝諭勛向用仙銀器盛食今欲設二親几筵上不得及八廟欲通奉又迫期難辦若何勛卽以朝用所製器百餘進之曰此亦高士所化仙銀也帝大悅增勛歲祿百石仲文因薦朝用朝用獻萬金助雷壇工費帝嘉其忠授紫府宣忠高士朝用請歲進數萬金以資國用帝益喜已而術不驗其徒王子巖攻發其隱帝執子巖朝用俱付鎮撫考訊朝用所獻銀故出助貲事既敗帝亦寢疎勛明年勛亦下獄朝用乃脅勛賄捶死其家人復上疏瀆奏帝怒遂論死龔可佩嘉定人

出家之崑山爲道士通曉道家神名由仲文進諸大臣撰青詞者時從可佩問道家故事俱愛之得爲太常博士帝命入西宮教宮人習法事累遷太常少卿一日帝詣西宮問可佩何在奄人譖之曰可佩嗜酒安肯教宮人帝怒使使偵之使者報可佩醉員外郎邵峻所帝益怒執下詔獄并逮峻俱杖六十可佩杖死峻亦奪官峻與可佩故無交無敢白其枉者可佩屍暴潞河爲羣犬所食藍道行方士也以扶鸞術見帝帝大信幸之有所問輒密封遣中官詣壇焚之所答多不如有帝咎中官穢褻中官懼交通道行啓視而後焚之答具如旨帝喜問今天下何以不治道行假乩仙答曰賢不竟用不肖不退耳問孰爲賢不肖答曰賢者徐階楊博不肖則嚴嵩

又問果爾上仙何不殛之荅曰待皇帝自殛帝心動會御史鄒應龍劾嵩疏上帝卽放嵩還已嵩訶知道行所爲厚賂帝左右發其怙寵招權諸不法事下詔獄坐論死得釋胡大順者仲文同縣人緣仲文進供事靈濟宮仲文死大順以奸欺事發詔斥回籍後覲復用僞撰萬壽金書一帙詭稱呂祖所作且言呂祖授三元大丹用黑鉛取白名先天水銀鍛之則成青霞玉粉神丹却疾不老遣其子元玉從妖人何廷玉齋入京因左演法藍田玉左正一羅萬象以通內官趙楹獻之帝田玉者鐵柱觀道士嚴嵩罷歸至南昌值聖誕田玉爲帝建醮會御史姜儆訪祕法至嵩索田玉諸符籙進獻田玉亦自以召鶴術託儆附奏得召爲演法與萬象並以扶鸞術供

奉西內因交歡楹時帝方幸此三人故廷玉厚賄之以進帝覽其書問曰旣云此書扶乩者何不來田玉等遂詐爲聖諭徵之至則屢上書求見帝語徐階曰自藍道行下獄遂百孽擾官今大順可復用乎對曰扶乩之說惟中外交通間有驗者否則茫然不知今官孽已久似非道行所致且用此輩孽未必不生小人無賴宜治以法帝悟報曰田玉無狀去冬代廷玉進水銀藥遂詐傳密旨徵取大順不治無以儆將來階對水銀不可服食詐傳詔旨罪尤重倘置不問羣小益無忌互相朋結恐釀大患乃命執大順田玉萬象等下錦衣獄不知其奸由楹也錦衣上獄詞帝有意寬之以問階階曰詔旨至重倘聽其矯傳他日夜半出片紙有所指揮將若之何此

不可不重治乃下諸人法司令重擬楹具密奏匿殿樞中伺
間出伏帝前爲諸人申理帝大怒付司禮拷訊具得其交通
狀遂與大順田玉萬象廷玉元玉並論死楹尋瘐死帝以逆
囚當顯戮怒所司不如法奏請責對狀尚書黃光昇等引罪
詔停司官俸時嘉靖四十四年也世宗朝奏章有前朝後朝
之說前朝所進者諸司章疏也他方士雜流有所陳請則從
後朝入前朝官不與聞故無人摘發賴帝晚年漸悟其妄而
政府力爲執奏諸奸獲正法云王金者鄆縣人爲國子生以
睚眦殺人罪當死知縣陰應麟雅好黃白術聞金有秘方爲
之解得末減金遂逃京師匿通政使趙文華所以仙酒獻文
華文華以獻帝及文華視師江南金落魄無所遇一日帝於

秘殿扶乩言服芝可延年使使採芝天下四方來獻者盡積
於苑中中使嘗竊出市人復進之以邀賞金厚結中使得芝
萬本聚爲一山號曰萬歲芝山又僞爲五色龜欲因禮部以
獻尚書吳山不爲進山罷金遂自進之帝大喜諭禮部龜芝
五色旣全五數又備豈非上仙之賜乃遣官告太廟禮官袁
燁率廷臣表賀而授金太醫院御醫先是總督胡宗憲獻白
鹿者再帝喜曰一歲二瑞天眷也命告謝元極寶殿及太廟
進宗憲秩百官表賀已宗憲獻靈芝五白龜二帝益喜賜金
幣鶴衣告廟表賀如初不數日龜死帝曰天降靈物朕固疑
處塵寰不久也淮王獻白雁二帝曰天降祥羽其告廟嚴嵩
孫鵠獻玉兔一靈芝六十四藍道行獻瑞龜俱遣中官獻太

廟廷臣表賀未幾兔生二子禮官請謝元告廟是月兔又生二子帝以爲延生之祥特建謝典告廟免賀已又數生子皆稱賀其他西苑嘉禾顯陵甘露無不告廟稱賀者當是時陶仲文已死嚴嵩亦罷政藍道行又以詐僞誅宮中數見妖孽帝春秋高意邑邑不樂中官思所以娛之因設詐誑帝四十二年五月帝夜坐延中獲一桃御幄後左右言自空中下帝大喜曰天賜也修迎恩醮五日翌日復降一桃其夜白兔生二子帝益喜謝元告廟未幾壽鹿亦生二子廷臣表賀帝以奇祥三錫天眷非常手詔褒答時遣官求方士於四方至者日衆帝知其多妄亦不甚信豐城人熊顯進仙書六十六冊但賜冠帶銀幣遣還方士趙添壽進祕法三十二種醫士申

文亦進二種品但留覽無所錫金思所以動帝乃與世文及陶世恩陶倣劉文彬高守中僞造諸品仙方養老新書七元天擒護國兵策與所製金石藥並進其方詭祕不可辨性燥非服其所宜帝御之稍稍火發不能愈世恩竟得遷太常卿倣太醫院使文彬太常博士未幾帝大漸遺詔歸罪金等命悉正典刑五人竝論死繫獄隆慶四年十月高拱柄國盡反徐階之政乃宥金等死編口外爲民

顧可學無錫人舉進士歷官營繕郎中正德中遷浙江參議言官劾其在部時盜官帑斥歸家居二十餘年矚世宗好長生而同年生嚴嵩方柄國乃厚賄嵩自言能煉童男女洩爲秋石服之延年嵩爲言於帝遣使齎金幣就其家賜之可學

詣闕謝遂命爲右通政寓嵩家專煉秋石嘉靖二十四年起拜工部尚書尋改禮部再加至太子太保時盛端明亦以方術承帝眷然頗知恥閉門不通賓客可學則揚揚自喜請囑公事人咸畏而惡之帝惑箕仙言手詔問禮部古用芝入藥今產何所尚書吳山博引本草黃帝內傳漢舊儀王充論衡瑞命記言歷代皆以芝爲瑞然服食之法世未有傳所產地亦未敢預擬乃詔有司採之五嶽及太和龍虎三茅齊雲鶴鳴諸山無何宛平民獻芝五本帝悅賚銀幣自是來獻者接踵時又採銀礦採龍涎香使者四出論者咸咎可學可學尋以年老乞休卒賜祭葬諡榮僖端明饒平人舉進士由庶吉士歷官右副都御史督南京糧儲劾罷家居十年自言通曉

藥石服之可長生由陶仲文以進嚴嵩亦左右之遂召爲禮部右侍郎尋拜工部尚書改禮部加太子少保皆與可學並命二人但食祿不治事供奉藥物而已端明頗負才名晚由他途進士論恥之端明內不自安引去卒於家賜祭葬諡榮簡隆慶初二人皆褫官奪諡朱隆禧者崑山人由進士歷順天府丞坐大計黜二十七年陶仲文赴太和山隆禧邀至其家以所傳長生祕術及所製香劑祈代進仲文還朝奏之帝悅卽其家賜白金飛魚服隆禧入朝謝恩帝以大計罷閒官例不復起加太常卿致仕居二年加禮部右侍郎會有邊警仲文乘間薦隆禧知兵帝曰祖宗法不可廢卒不用旣卒其妻請卹典所司執不予帝特諭予之隆慶初褫官帝晚年求

方術益急仲文可學輩皆前死四十一年冬命御史姜儆王
八任分行天下訪求方士及符籙祕書儆江南山東浙江江
西福建廣東廣西大任畿輔河南湖廣四川山西陝西雲南
貴州兩人徧採訪四十三年十月還朝上所得法祕數千冊
方士唐秩劉文彬等數人兩人擢侍講學士秩等賜第京師
儆不自安尋引退大任人翰林不爲同官所齒隆慶元年正
月言官劾兩人所進劉文彬等已正刑章宜并罪吏部言儆
等奉命採訪似非希覲但其巡方時頗遭物議法宜奪職從

